





大明仁孝皇后勸善書卷之八

嘉言

○**儒**玉不琢不成器人不學不知道。○書能達人。○人生至樂莫如讀書。○**釋**若復有人於此經中乃至受持四句偈等為他人說其福甚多。○後五百歲其有衆生得聞是經信解受持是人則為第一希有。○能於此經受持讀誦則為如來以佛智慧悉知是人悉見是人皆得成就無量無邊功德。○喜讚嘆誦經法者所生之處音聲雅妙聞者歡喜。○大乘經典信心供養顯揚如來智慧聖德。

○**道**值遇經法普得濟度。全其本年無有中殤。○一誦諸天禮十轉枯骨生。○傳教世間流通讀誦即有飛天神王破邪金剛護法靈童救苦真人金精猛獸隨所擁護捍厄扶衰。○經之至微宣道之意正真之教誦之千日。白日升天致慶七祖。

感應

漢劉向校書天祿閣專精覃思夜有老人著緋衣藜杖扣閣進見向暗中

誦書老人乃吹杖端爛然火明。因說開闢已前事。授洪範五行之文。自云是太乙之精。聞金卯姓有博學者。下而觀之。復出懷中天文地圖授之。元。尹夢龍中興人。母喪負土為墳。結廬居其側。手書孝經千餘卷。散鄉人讀之。有群鳥集其塚樹。

唐江陵府公安縣潺陵村。王從貴妹四娘。未嫁時常持金剛經。貞觀年間俄卒。埋已三日。其家覆墓。聞呻吟之聲。開墓視之。乃見四娘起坐棺中。良久言曰。初至冥府。陰官聞有持經功德。合掌讚歎。且令放還。

唐開元中有盧氏者。寄住滑州。晝日閑坐廳事。見二皂衫人入門。盧問為誰。荅曰。是里正奉帖追公。盧甚愕然。問何故相追。因求觀帖。見封上作衛縣字。遂開文字錯繆。不復似人書。恠而詰焉。吏言奉命相追。不知其故。俄見已馬已韉在階下。不得已上馬去。顧見其屍坐在床上。心甚惡之。倉卒之際。不知是死。又見馬出不由門。皆行牆上。乃驚愕下泣。方知必死。恨不與姊妹等別。行可數十里。至一城。城甚壯麗。問此何城。吏言王國。即追君所司。入城後。吏欲將盧見王。經一院過。問此何院。吏云是御史大夫院。因

問大夫何姓名。云。姓李。名某。盧驚喜。白吏曰。此我表兄。令吏通。須臾便出。相見悲喜。具言平昔。延入坐語。大夫謂曰。弟之念誦功德甚多。良由金剛經。是聖教之骨髓。乃深不可思議功德者也。盧初入院中。見數十人皆是衣冠。其後大半繫在網中。或無衣。或露頂。盧問此悉何人。云。是陽地衣冠。網中悉緣罪重。弟若能為一說法。見之者悉得昇天。遂命取高座。令盧升座。誦金剛般若波羅密經。網中人已有出頭者。至半之後。皆出地上。或褒衣大袖。或乘車御雲。誦既終。往生都盡。及入謁見王。呼為法師。致敬甚厚。王云。君大德不可思議。筭又未盡。屢歎念誦之功。尋令向吏送之。回。既至舍。見家人披頭哭泣。尸卧地上。心甚惻然。俄有婢從庭前入堂。吏令隨上階而前。魂神忽已入體。因此遂活。

梁東陽張瑤病死數日。方活。云。被所由領過一府舍中。貴人僦從如王者。瑤至庭內。見其所殺衆生。盡來待對。瑤曾殺一牛。以布兩端與之。追福其牛。亦在庭中。角戴兩布。又曾供養病僧。其僧亦來。謂所司曰。張瑤持金剛經滿三千遍。功德已入骨。又寫法華經一部。福多罪少。故未合死。所司命

稱之。畜生盡起。而瑤猶在地上。所司取司簿勘之。一紫衣引青衫吏抱黃簿至。云張瑤名已掩了。合死。視簿有紙帖掩其名。又命取太山簿。頃之亦紫衣吏人引青衫吏持簿至。云張瑤掩了。合死。又命取閻內簿檢。使者云名始掩半。未合死。王問瑤云。汝名兩處全掩。一處掩半。六分之內。五分合死。以功德故。放汝歸閻浮地。勿復殺生命。瑤入地獄。遍見受罪。火坑鑊湯。無不見有。僧曰。汝勿復為罪。遂即以印印其股曰。將此為信。既活。印甚分明。人皆見之。

宋咸淳己巳。杭州一老嫗。年六十餘。嘗誦金剛經。誦畢。佩帶於身。中秋到江頭觀潮。值潮頭家高澎湃衝激。吸沒百餘人。嫗亦預焉。已而潮回。乃獨送此嫗于江之濱。儼然存活。人問之。則曰。見潮神閱簿。言我曾誦金剛經有功。送回陽世。視衣襟皆濕。惟所佩之經獨乾。

唐邢州司馬柳儉。隋大業十年。任岐州岐陽宮監。義寧九年。坐誣枉繫大理寺。儉志心誦金剛般若經。有兩紙未遍。不覺眠睡。夢一婆羅門僧報云。檀越宜誦經。今遍即應得出。儉忽寤。勤誦不懈。經二日。忽有勅喚就朝堂。

放免。又儉。他時夜誦經至三更。忽聞有異香散漫滿宅。至曉不絕。皆感應所致也。

宋建炎間。沈叅政避虜難于徐之山谷中。一夕在草莽間歎曰。吾母在順昌。相去三百餘里。未知存否。念吾母平生誦金剛經。今三十年矣。金剛神豈不能救此難耶。因涕泣良久。足疼以手摩之。忽有大木葉兩片飛墮其前。遂取包兩足跟。有頃聞鷄聲。遂起行步。若有神助。及曉至順昌城下。視足跟木葉。乃其母所誦金剛經前面兩版。遂得與母相見。

元喻子慶。建昌新城縣人也。少從鄧願齋學。及長遊淮。自言得隱形術。一日有殺傷在館東之門。衆驚散。捕者環列道途。喻挺身出其間。捕者不見之。喻則悉見也。後歸故鄉。家甚貧。歲歲鄉館。每晨起必正衣冠。迎日而揖。焚香誦金剛經一過。然後學者至授書。年八十餘。耳目聰明。行步便捷。至元丁丑以來。鄉學多廢。日煮金剛經以食。人異之。一日無病。過其女家曰。明日吾從此逝矣。汝能飯我乎。女曰。何言恠也。喻曰。不飯我則已。女為黍食之。喻携錢百文。雇其隣里。明日為我掘金井。其携鋤及箕來。隣曰。教授

無病。何為若此言也。喻曰。汝但來。先汝雇者。懼汝不來也。明日雇者如約。喻指畫去處。度棺大小而撫焉。及午時可矣。謂曰。汝往飯吾女家。其人飯畢視之。則已端坐隱几而化矣。

元建寧府城內有陳公。於至元己未間。夫妻長齋。日夜持誦金剛經。後於癸巳年。忽一日香湯沐浴。端坐誦經而逝。有神光繞室。合城僧道備香花迎奉。柴塔焚化。壽年九十有七歲。

元建寧府建陽縣地名茶坂洪山。白蓮堂有一僧。平昔齋戒。持誦金剛經。及華嚴經。又禮華嚴塔。後於至元三十年間。忽然示寂。師孫將葬之。明日再還魂。云是去錯路頭了。急討香湯浴罷。穿袈裟如法。正身端坐而逝。

唐魚萬盈。京北市井簾猛之人。元和七年。其所居宅有大毒蛇。其家見者。皆驚怖。萬盈怒。一旦持巨棒。伺其出擊殺之。烹炙以食。因得疾。藏腑痛楚。遂卒。心尚微暖。七日後蘇。云初見其使三四人來追。行暗中十餘里。見一人獨行。其光繞身。四照數尺。口念經隨走。就其光問姓字。云我姓趙。名某。常念者金剛經。汝但莫離我。使者不敢近。漸失所在。久之至其家。萬盈拜

謝曰。向不遇至人。定不回矣。其人授以金剛經。念遂得還。及再生。持本重念。更無遺闕。所疾亦失。因斷酒肉。不復殺害。

唐張國英。大曆年間。為西蜀崔公寧兵士。時楊林反叛。國英與之戰。遭流矢中腹。醫者曰。藥無所施。旦夕必死。因與同伍叙別。令備棺材。妻兒環泣。人不忍聞。國英舊持金剛經。忽夜夢胡僧相尋。撫憐如有素。與藥一丸。令吞之。且曰。無足慮矣。翌日果瀉下箭鏃。瘡合而愈。蓋持經之力也。

唐元和九年。強伯達家于房州。世傳惡疾。凡二百年矣。伯達纔冠。便患風癩。父兄親族以為必不可療。恐貽後患。請送之山中。其父累糧置伯達于巖下。泣涕而別。絕食未幾。忽有僧過。傷之曰。汝可念金剛經內四句偈。或脫斯苦。伯達受教。念之累日。一旦感一大虎來。伯達不敢開眼。但至誠念偈。虎乃遍舐其瘡。唯覺涼冷。如傳妙藥。了無他苦。良久虎去。自顧其瘡皆已乾合。明日前僧復至。即於山邊拾青草一握。授之曰。可以洗瘡。但歸家日。以此煎湯洗浴。伯達感泣拜謝。僧拊其背而去。及歸家。親族大驚。具述其事。浴訖。身體潔然。都無瘡痕。隣里歎異。自此相傳之疾遂止。

唐沈嘉會貞觀中任校書郎以事配蘭州思歸甚切每旦暮常東向拜太
山願得生還積二百餘日永徽六年十月三日夜見二童子儀服甚秀云
是太山府君之子府君媿公朝夕拜禮故遣奉迎嘉會云太山三千餘里
何能可去童子曰先生閉目勿憂道遠即依其言瞬息之間便到宮觀敞
麗童子引入謁拜府君即延入曲室對坐談笑無所不知謂嘉會曰人之
為惡若不為人誅死後必為鬼得而治無有徼幸而免者也若日待金剛
經一遍即萬罪皆滅鬼官不能拘矣又云前府君有過天曹黜之某姓劉
嘉會亦不敢問其他也嘗與嘉會雙陸兼設酒肴嘉會起於小廳東見姑
臧令慕容仁執執笏端坐云府君帖追到此已六十日未蒙處分嘉會坐
啓府君便令召仁執入謂曰公縣下有婦人阿趙被縣尉無狀拷殺阿趙
來訴遂誤追公庭前有盆水府君令洗面仍遣一小兒送歸嘉會亦辭復
令二男送凡在太山二十八日家人但覺精神昏昧既還如舊嘉會話仁
執於衆長史趙持滿令人驗之無不同自此常持經遇赦得歸

唐劉鴻漸者御史大夫展之族子乾元初遇亂南徙有僧令誦金剛經鴻

漸日誦經。至上元年客壽春。暇日出門。忽然死去。見二吏云。奉大尉牒令追鴻漸云。初不相識。大尉何以見命。意欲拒抗。二吏忽爾直前拖拽。鴻漸請著衫。吏不肯放。牽行。未久。倏過淮。至一村。須臾。持大麻衫及腰帶。令鴻漸著。笑云。真措大衫也。因而向北行。路漸梗澁。前至大城。入城有府舍。嚴麗。忽見素勸讀經之僧。從署中出。僧後童子識鴻漸。徑至其所。問十六郎何以至此。因走白和尚云。劉十六郎適為吏追。以誦經功德。豈不往救之。鴻漸尋至僧所。虔禮求救。僧曰。弟子行無苦。須臾。吏引鴻漸入詔廳。聽事案後有五色浮圖。高三四尺。迴旋轉動。未及考問。僧已入門。浮圖變成美丈夫。年三十許。云是中丞降階接僧。問和尚何以復來。僧云。劉鴻漸是已弟子。持金剛經。功力甚至。其筭又未盡。宜見釋也。王曰。若持金剛經。則願聞。因令跪誦。鴻漸誦兩紙訖。忽然遺忘。廳西有人手持金鉤龍頭幡。幡上碧字書金剛經。布經於鴻漸前。令分明讀。經畢。都不見人。但餘閑宇。閑寂。因爾出門。唯見追吏。忽有物狀如兩日。來擊鴻漸。鴻漸惶懼奔走。忽見道傍有水。鴻漸欲止而飲之。追吏云。此是人膏血。澄久上清耳。其下悉是餘。

皮爛肉。飲之不得還矣。須臾至舍。見形骸卧在床上。心頗惆悵。鬼自後推之入。冥然如入房戶。遂活。

唐劉逸。在汴時。韓弘為右廂虞候。王某為左廂虞候。與弘相善。或謂二人結軍心。將不利於劉。劉大怒。俱召詰之。弘即劉之甥。因控地碎首大言。劉意稍解。王某年老。股慄不能自韜。劉令杖背三十。時新造赤棒。固以筋漆。遭者幾死。韓意王必死矣。及昏。造其家。恠無哭聲。又疑其不敢哭耳。訪其門卒。即云大使無恙。韓素與熟。遂至卧內問之。云我讀金剛經四十年矣。今方得力。初被杖時。見巨手如箕。翕然遮背。因袒示韓。都無撻痕。韓舊不好釋氏。由此始與僧往來。日自寫經十紙。及貴。計數百軸。後在中書盛暑。有諫官因事見謁。韓方浹汗。寫經。諫官恠問之。乃具道王某事。

唐廣陵張嘉猷者。寶應初為明州司馬。遇疾卒。載喪還家。葬於廣陵南郭門外。永泰初。故人有勞氏者。行至郭南。坐浮圖下。坐久如夢。忽見猷乘白馬南來。下馬相慰。如平生。然不脫席帽。低頭而語。勞問冥中罪福如何。猷云。罪福昭然。莫不隨所為而得。但我素持金剛經。因得無累。亦當別有所

達在旬月間耳。公還為白家兄。令誦金剛經一千遍。何故將我香爐盛諸惡物。公家亦有兩卷經。可為轉之。增已之福。勞既寔。乃發誓誦經。

隋王倬大業中為天水郡司法。薛舉作逆。攻陷郡城。盡殺官吏。至倬。行刑者刃斷。監者白舉遣力士宋羅睺解佩刀斬之。刀亦寸折。舉大驚。問有何術。荅曰。祖父以來持金剛般若。恐是此力。遂放去。投村避賊。入人家溷室中。賊眾續至。問何人。云。向被刑刀折者。賊曰。我遙見光上屬于天。疑有異寶。無心相害。

唐天后朝裴宣禮為地官侍郎。坐事被繫。宣禮憂迫。唯念平日所持金剛經。枷鎖自脫。推官親訪問之。後得幸免。侍御史任植亦同禁。勸其誦經。亦免。

唐貞觀七年。長安縣尉李行及坐累。當就刑。專誦金剛經一千遍。其鎖自開。時已秋分。數日按獄。當時決罰者千餘人。並不免。唯行及恩宥。被配涼州。會赦得還。

五代醫師能大。居京師高頭街。藝術顯行。致家貲鉅萬。晚歲於城外買

名園畜姬妾十輩。全失衛生之理。但每日早起誦金剛經數卷。既卒三歲。女真犯關。發其墓。剔取金帶衣服。棄尸道傍。亂定。其子訥脩理墳塋。見僵尸暴于墓左。頽然若生。略不少損。乃知金剛不壞身之說。非虛語也。

唐貞元十五年。嘉州趙居敬。常持金剛經。清潔有素。曾往湖南。舟行洞庭湖。忽有煙氣如雲。來覆其舟。俄頃而散。舟中人但見趙居敬不在。衆甚驚異。久之乃見居敬凌波而出。衣服不濡。懷有珍寶。人問其故。曰。向者常持金剛經。適有二僧來。召至龍王宮。左右命升殿誦經。得珠寶數十事。二僧相送出宮。其一僧曰。寄少信至衡岳觀音臺比丘紹真。付之。但言汝和尚寄與。令轉金剛經。後至其地訪問。果有人云。和尚滅度已五六年矣。

唐天寶中。常州宜興縣吳逵。每日五更誦金剛經七卷。嘗作詩云。五更鐘動莫貪眠。抖擻精神向佛前。一拜一聲彌陀佛。西方池內添朶蓮。年至九十二歲。忽然辭別妻子。云有二使者呼召其去。遂見閻摩天子。天子問生前作何業。逵云。自幼至今常誦金剛經。天子因賜逵殿階坐。令其誦經。方念至舍衛國。口中出奇異妙香。忽現一佛相。天子合掌歎喜。語逵曰。君持

經有般若之功。吾送汝便生舍衛國。承品官之後。受國家爵祿。長享福壽。子孫榮貴。逵即拜謝。天子勅二使者。送往舍衛國。託生。因歸舊舍。就空中。叫妻兒叮囑。具道其事。吾死得經力。今准閻摩天子勅命。得託生舍衛國中。特來相別。汝等切宜精心。受持金剛經。及妙法蓮華經。具府鬼神甚敬。重此二經。其功德不可思議。如不識字。但能每日用香花果餅燈燭供養。自有福根。仍不可殺生。蠢動含靈。皆有佛性。若能回贖物命。放還生路。亦主無病延壽之報。妻兒聞語悲號。逵曰。不用傷感。人生在世。略有半善。可憑。命盡之後。猶如夜眠。天曉還見日月之光。人無善心。更無殺生。一死之後。驅入陰府。如行刀劍黑闇之路。恐汝等不知。特來相告。言訖不見。

唐趙安成都人。每日常持金剛經十遍。太和四年。會蠻寇退。欲歸寧。嘗於途中見賣軍器者。遂置于家。為仇人告之于官府。追者至門。安泣別家屬。禮經而去。既為牢獄所苦。甘自伏罪。將科斷次。引至帥司。其枷鎖自解。吏詰之。安曰。實不為盜。此器得之巷陌耳。吏叱之不信。呈案之時。忽見於安名下大書一放字。竟不知其由。有司異之。因是得免罪。洎還家。齋沐禮經。

開匣視之。見其經紙皆損破。如被人搗碎模樣。妻云。曾一日聞其匣中響。即安受拷訊之時也。

唐陳利賓者。會稽郡人也。弱冠明經擢第。善屬文。為長城縣尉。少誦金剛經。每至厄難。多獲其助。開元中。自會稽江行之東陽。會天久雨。江水漲漫。與其徒二十餘船同發。乘風掛帆。湏臾天色暗昧。風勢益壯。至界石竇上。水擁閼激流而下。波濤衝擊。勢不得泊。其前輩二十餘舟皆至竇口而溺。舟人大懼。利賓誦經至激流所。忽有一物狀如赤龍。橫出扶舟。因是得濟。議者以為誦經之力也。

唐開元三年。京兆府武功縣丞蘇朗持金剛經。闔門五十餘口並皆蔬食。其妻崔氏亦誦此經。崔氏有親表。見其喫菜年深。面無顏色。勸其私買肉味。崔氏因使人竊市羊肉三斤。暗處食之。纔喫一嚙。變之為骨。咽塞不下。又不能出。日暮氣絕。以體微煖。未敢棺殮。從六月十五日死。至二十一日方蘇。家人問其事。云行至冥府。王問汝是武功縣丞妻。汝夫是大菩薩。汝因食肉。金剛善神變肉為骨。以此警汝。合年七十。為汝受持金剛般若。今

可添至九十。却放還生。武功一縣道俗咸知。縣官具錄申州。州官申臺。帝聞因此御注經文。流布天下。

唐河東薛少殷。好奉佛。常持誦金剛經。後舉進士。忽一日暴亡於長安崇義里。云有一使持牒曰。大使追。俄引至官府。見其主者。即鮮于叔明也。少殷將有所訴。叔明曰。寒食將至。何為割鷄子食也。東面有一僧。手持寶塔。塔扉雙開。少殷已在其中。叔明曰。我方欲立事。和尚何為救此人。乃迫而出。令引少殷見判官。及出門之西院。閤者入白。少頃聞命。乃引入。所見乃亡兄也。叙泣久之。謂曰。吾以汝久未成名。欲薦汝於此分主公事。故假追來。非有他事。少殷時新婚。力辭不願。兄曰。吾同院有王判官。職居西曹。汝既來此。可以一謁而去。乃命引少殷於西曹相見。接遇甚厚。俄聞脩饌。海陸畢備。未間。王判官忽起。又見向者持塔僧。僧曰。不可食。食則無由歸矣。少殷曰。飢甚奈何。僧曰。唯蜜煎薑可食。乃取食之。而王判官竟不至。僧曰。可去矣。少殷復出詣兄。泣且請去。兄知其不可留。乃入白官府。許之。少殷曰。既得歸人間。願知當為何官。兄曰。此甚難言。亦何用知之。少殷懇請。乃

召一吏。取籍尋之。不令少殷見。既去。每過危險。皆見其僧前引。少殷曰。弟子素不識和尚。何蒙見護如此。僧曰。汝持金剛經。故相護爾。既醒。具述其事。

唐吳思玄。天后朝為太學博士。信釋氏。持金剛經。日兩遍。多有靈應。後稍怠。日念一遍。長安中。思玄在京病。有巫褚細兒言。事如神。思玄往就見。細兒驚曰。公有何術。鬼見皆走。思玄私負。知是經力。倍加精勵。日念五遍。兄病疾醫無効。思玄至。心念經。三日而愈。思玄曾於渭橋見一老人。年八十餘。著縷麻服。問之曰。為所生母也。思玄恠之。荅曰。母年四十三時。有異僧教云。汝欲長壽否。但念金剛經。母即發心。日念兩遍。終一百七。姨及隣母讀之。並過百歲。思玄遵母業。年至九十餘歲。

宋建炎間。建康人屠二。常誦金剛經。一日。番人到城下。屠二嘆曰。金剛不壞身。今如之何。是夕忽夢金剛神曰。汝宿欠連四命。來日到汝家。當告稱連四。此人聞名。必放汝。來日番人果入來。屠二依金剛神之言。拜告番人。具述前驗。求活。連四曰。吾萬里之程。殺戮冤枉不少。今改前非。放汝。驗持

受是經者感應如此。

梁天監中。琰法師居長安招提寺。年十一歲為僧。忽一日同寺中數人僧行往相師家求相占。至琰曰。可惜聰明。奈何壽短。只年十八歲。刻定夭亡。琰歸就藏殿焚香作禮。發願乞賜經一卷。精專誦持。任手就藏函內抽得金剛經一卷。不捨晝夜。精心靜念。忽一日夜見房中有五色光現。湏臾見一僧身長丈五許。語琰曰。汝壽止十八歲夭亡。得念經有感。向去增延壽數言。訖潛隱。因此感應。愈更精勤。年及十九。再訪相師。師愕然謂琰曰。吾昔曾定師夭亡。今日再觀。死氣已去。構何善業。再添法齡耶。琰曰。專心誦經耳。相師稽首云。吾在塵俗中。豈得知經力有此殊勝。觀師此去。壽可至九十二。後果應相師言。終于招提寺。

唐吉州龍興寺三刀法師本姓曹。天性蔬食。幼小出家。于時安史之亂。南方不寧。兵革未息。大曆七年十一月。廣州呂大夫被蕃賊攻城。洪州路已牒吉州刺史劉寧徵兵三千。同收蕃賊。法師舊名伯連。為人貌雖強惡。心甚循良。常持金剛經。以簡盛而佩之。無何被括為軍。呈閱之次。選充行營。

小將非其所好。遂亡命焉。時本州擒送本軍。劉怒令於朱木橋處斬。三下刀俱折。劉恠而問之。對曰。素志捨家。常持經法。蓋由怯懦。恐斬軍威。是以亡耳。問經何在。曰。被獲時遺墜。令尋討。果數百步外得之。竹筒有刀痕而幾絕矣。劉拱手稱歎。乃縱為僧。奏聞勅下本道。號三刀法師。居本郡龍興寺。後加精進。卒于住所。

隋蕭瑀。武帝玄孫。梁王歸之子。梁滅入隋。仕至中書令。封宋國公。篤信佛法。常持金剛經。議伐高麗。不合旨。上大怒。與賀若弼高熲同禁。欲寘於法。瑀就其所。八日念金剛經七百遍。明日桎梏忽自脫。守者失色。復桎梏至殿前。獨宥瑀。二人即重罰。因著般若經靈驗一十八條。乃造寶塔貯經。檀木為之。高三尺。感一鑰石像。忽在庭中。以安塔中。獲舍利百粒。貞觀十一年。見普賢菩薩冉冉正西而去。

唐梓州慧義寺釋清虛。姓唐。本州人也。長誦金剛般若。三業無懈。嘗於山林間揚諷。有七鹿馴遶。若傾聽焉。聲息乃去。又鄰居失火。連覺灰燼。唯虛室獨存。長安二年。遊藍田悟真寺。上方北院舊無井泉。遠汲於澗。運致甚

勞時華嚴大師法藏聞虛揚經靈驗乃請入彌勒閣焚香誦經達旦者三
忽假寐中見三玉女在閣西北山腹以刀子剗地便見泉湧虛往其處遂
令人掘之果獲甘泉用之不竭。

後唐江陵開元寺經院僧法岳日持金剛經三七遍長慶初得病卒至冥
司見王問師生平作何功德對曰常念金剛般若揖上殿登繡座誦經七
遍侍衛悉合掌階下考掠論對皆停息而聽誦畢後遣一吏引還王下階
送云上人更得三十年在人間勿廢誦讀因隨吏行數十里至大坑吏自
後推之若隕空焉從是而寤死已七日唯面不冷。

唐成都府建昌寺僧牟師開成三年八月暴卒忽見四人來迎至一河側
多有大樹使者曰此非人間也還記在生事業否牟曰幼年曾念金剛經
使者云此經冥司甚重請誦之四人合掌靜聽至四果章四人止之忽然
不見須臾又一八來問曰向者何人到此牟具說之曰此四人已生天師
可速歸也迴身見一大蛇作人語索命牟曰不省害汝時蛇曰在雅州時
牟因思十三歲時斫柴次誤傷同伴殺之非我也蛇曰因你傷我遂走不

得致被人殺。須還我命。年許轉金剛經一千遍。蛇即低頭而去。傍有送者。抱牢拋本身上。遂活。時淨衆寺僧仲詵來看。具說其事。因託轉經一日。未畢。其夜又夢。真使曰。冤家不去。須更得衆僧誦半日方足。次夕夢蛇謝曰。感經功德。已得生人類矣。言訖而寤。

唐貞元中。荊州天崇寺僧智燈。常持誦金剛經。遇疾而死。其手猶熱。不即入木。經七日再活。云。初至陰府。王者降階迎接。叙揖罷。謂曰。更容上人十年在世。受持真經。免離生死。僧因問王。人間衆僧中。曾食薤菜。人用酒服。可否。王曰。此大違本教。僧又云。律中有開遮條。如何。曰。此後人加之。非佛意也。自後荊州僧無敢食者。

唐孫明者。鄭州陽武人也。少貧賤。為盧氏莊客。善持金剛經。日誦二十遍。凡三十年。初持經時。便不如葷。忽一日。正念誦次。暴卒。見二吏來追明。意謂縣吏。便隨其去。行可五六里。至一官府。門吏云。王已出。吏因閉明於空室中。其室縱廣五六十間。經七日。王從外歸。吏引見王。王問汝有何福。果答云。但持金剛經已三十年。王言此大果也。迴語左右曰。昨得祇洹家。

牒論孫明念誦勤懇請延二十年壽乃知脩誦不可思議。延汝二十載以償功也。遂令送還其家。殯葬已畢。神雖復體。家人不知。會有獵者從殯所過。聞號呼聲。報其家人。開視遂活。時天寶末也。

唐天寶初。易州參軍田氏。性好畋獵。一日於易州放鷹。於叢棘中見一卷書。取視之。乃金剛經。自爾發心誦持。越數年。誦及二千餘遍。然於畋獵亦不能輟。後得疾暴卒。即日被攝至地府。見諸鳥獸周迴數匝。就已索命。領之見王。王問作罪何多。田無以對。令所由領去。推問其徒十餘人。同至吏局。吏令開口。以一圓藥致其徒口中。便成烈火。遍身焦爛。頃吏灰滅。俄復成人。如是經六七日。後至田氏。累藥三圓而不見火。吏恠之。復引見王。具以事白。王問在生有何福德。田云。初以畋獵為務。嘗於易州叢棘中得一卷金剛經。持誦已及二千餘遍。王曰。正此滅罪。王命左右。檢田福簿。還白如言。王令誦經。纔三紙許。迴視庭中鳥獸並不復見。誦畢。王稱美之。云。誦二千遍。延十五年壽。遂得放還。

唐主陀為鷹揚府果毅。因病解歸。遂絕葷食。發心念金剛經。日逐五遍。後

染瘴疾。見二十二鬼來。陀即急誦。鬼聞便退。遙曰。王令追汝。汝且止經。於是暫歇。鬼又近前。陀昏迷欲絕。須臾又見一鬼來。云王令誦經。人釋放六日。既醒。一心持念。晝夜不息。六日雖過。鬼亦不至。夜聞空中有聲呼曰。汝以持經功德。當壽九十。竟如其言。

唐內臣姓楊。忘其名。復恭之弟也。崇敬佛法。適秦宗權叛。陷賊內二十餘年。恒讀誦金剛經。雖在賊中。未嘗輒廢。會宗權男為襄陽節度使。楊為監軍使。楊因人心危懼。遂誘麾下將趙德言。攻殺宗權男。發表舉德言為節度使。由是軍府稍定。民復田業矣。楊於課誦之功。益加精勵。嘗就牙門外柳樹下。焚香課誦。次歛有金字金剛經一卷。自空中飛下。楊拜捧而泣。震駭心目。得非信受精虔。獲茲善報也。故陷于賊黨二十年間。終能梟巨盜。立殊勲。克保福祿者。蓋佛之冥祐也。

唐蜀左營卒王殷。常讀金剛經。不如葷飲酒為貴。設庫子。前後為誤累。合死者數四。皆非意得免。至太和四年。郭釗鎮蜀。郭性嚴急。小不如意皆死。王殷因呈錦纈。郭嫌其惡弱。令袒背將斃之。郭有番狗。隨郭卧起。非本宅

人逢之輒喚忽吠聲立抱王殷之背驅逐不去郭異之怒遂解

宋釋德遵申州人初年五十得勞瘵疾醫藥不效且卧且起僅至骨立因發心絕葷持金剛經扶羸倚輔日至十遍困而彌勵曾未期月瘵疾頓瘳壽至七十八歲。

梁武帝天監十四年智藏法師初遊京輦帝深加禮敬至是帝為誌公建塔寺曰開善勅藏居之初相者曰師壽止三十一藏乃竭精修道專誦金剛經至厄年之暮俄空中曰承般若力得倍壽矣藏後出山相者驚曰短壽之相今無矣藏問今得至幾曰可六十餘於是江左道俗競誦此經乃至子今咸通屢著

唐永真中釋文照住河東府開元寺幼小出家性少聰慧常自恥之一旦詣栢梯寺禮曇延大師真容真有所禱忽若假寐見曇延身長一丈目光四射謂照曰爾所欲者吾安能致之有聰明經一卷求之可也因袖中出示之即金剛經令其日誦七遍既寤猶在目誦念無滯如久習焉自此聰明日勝一日。

唐宋汶牧黃州日。秦宗權阻命作亂。將欲大掠四境。蔡州有念金剛經行者。郡人咸敬之。宗權差為細作。令入黃州探事。行至黃州。未逾旬。為人告敗。宋汶大怒。令於軍門集衆決殺。忽報有官使到。將校等上言。方聞喜慶。不欲遽行殺戮。繇是旦令禁錮逾月。使臣不到。人命行刑。出狴牢次。報使入境。復且停止。使已發。引出就刑。值大將入衙見之。遽白於汶曰。黃州士馬精彊。城壘嚴峻。何懼奸賊窺覘。細作本非惡黨。特受制於人耳。將軍曲貸性命。足示寬恕。汶然之。命髡髮負鉗。緣化財物。造開元新寺。寺字將就。汶一夜夢八金剛告曰。負鉗僧若行如此。締構即終。盍釋其鉗。以旌善績。汶夢覺大異之。遂令釋鉗。待以殊禮。自後一州童稚。悉呼為金剛和尚。

唐釋神晏。姓劉。住梓州玄武縣福會寺。萬歲通天元年。被人告停劫賊繫瀘州獄。晏先持金剛經。乃精心虔誦月餘日。忽中夜見獄中光明如鎖自脫。遂蒙原有。

唐原州龍興寺。因大齋會。寺主僧夏臘既高。是為宿德。坐儼賓頭之下。有小僧者。自外後至。以無坐所。惟寺主下曠一位。小僧欲坐。寺主輒叱之。如

是數四小僧起齋失時。竟來就坐。寺主怒甚。倚柱而坐。以掌抵之。方欲舉手。大袖為柱所壓。不得下。合堂驚駭。小僧慙沮。不齋而還房。衆議恐是小僧道德所致。寺主遂與寺衆同往禮敬。小僧惶懼。自言初無道行。不敢濫受大德禮數。遂巡去。因問平生作何行業。云二十年唯持金剛經。衆皆讚歎。謂是金剛護持之力。便於柱所焚香頂禮。呪云。若是金剛威神力。當還此衣。於是随手而出也。

宋廖莘觀知潭州善化縣。時有一婆。每日誦金剛經於街市乞食。夜則歸宿山阿。忽數日不見行乞。群鷄噪集於其止處。令人往視之。見懷金剛經傍巖而化。群鷄銜土以覆之。

隋大業中。雍州長安縣有人姓趙名文若。死經七日復活。眷屬喜問所由。文若報云。當死之時。見人引向閻羅王所。問文若汝生存之時。作何福業。文若答王。受持金剛般若經。王歎云。善哉。此福第一。汝雖福善。且將示汝以受罪之處。令一人引文若北行十步。至一處有猪羊鷄魚鵝鴨之屬。競來從文若索命。文若云。吾不食汝身。何故見逼。諸畜生等各報云。汝往日

時某年某月某處食我頭脚四支。何故諱之。文若見畜引實不敢拒逞。唯知一心念佛謝罪。諸畜見為修福。一時放却。其引使人將文若至王所。說見受罪處訖。王付一椀釘。令文若食之。并用五釘針文若頭頂及其手足。然後放過。文若得蘇。其說此事。極患頭痛并及手足。久後得差。從是精勤誦持金剛般若。不敢遺漏寸陰。後因便至一驛廳上。暫時偃息。彷彿欲睡。于時夢見一青衣婦女急速而來。請救乞命。文若驚寤。即喚驛長問云。汝不為吾欲殺生不。驛長荅云。實為公欲殺一小羊。文若問云。其羊作何色。荅云。是青毳特羊。文若報云。汝急放却。吾與價直贖取放之。良由般若威力。冥資感應也。

唐遂州任善。病亡。同數俗人。一僧俱至閻王所。僧曰。常誦金剛經。王即合掌。忽有五色雲迎僧升天。冥官謂善曰。汝亦曾誦二十一遍。即令放還。唐長慶中。鄂州商人何老。同雇夫擎物。赴疲市。遇夜歇於山路。睡著。雇夫潛以刀斷其喉。棄于澗下。擔其物去。何老以常持金剛經之故。都無傷損。是間中。有直詣戒市。雇夫方欲賣物。次見何老大驚駭。何老安慰之云。是

經力也。非有他故。約不告訴。相與為僧。

唐宋義倫。麟德中為號王府典籤。暴卒。三日方蘇。云被追見王。王曰。君曾殺狗兔。今被論。君筭又合盡。然適見君師主云。君持金剛經。不唯釋罪。更合延年。我今放君。君能不喫酒肉。持念尊經否。義倫拜謝曰。能。又見殿內床上有一僧。可五六十。披衲。倫即拜禮。僧曰。吾是汝師。故相救。可依王語。義倫曰。諾。王令隨使者往看地獄。初入一處。見大鑊行列。其下燃火。鑊中煮人。痛苦之聲。莫不酸惻。更入一獄。鐵床甚濶。人卧其上。燒炙焦黑。形容不辨。西頭有三人。枯黑佇立。頗似婦人。向義倫叩頭云。不得食喫。已數百年。倫荅曰。我亦自無。何可與汝。更入一獄。向使者云。時熱。恐家人見。斂遂去。西南行數十步。後呼云。無文書。恐門家不放出。遂得朱書三行字。並不識。門司果問看了。放去。遂蘇。

唐李九師。本邛州臨邛縣人。常念金剛經。開成中暴亡。被使追攝。見王。有一僧於王前救免。又送出門云。我是須菩提。故來救汝。可努力修善。更得十三年。若執心堅固。當必生天。九師拜謝。爾時思得粥飲。無處不覓。乃發

聲大呼。僧亦與飲。飲訖又呼。忽覺在床。後持經愈勤。果十三年卒。臨終有異香。天樂信其生天不謬矣。

唐劉弼。貞觀元年。任江南縣尉。忽有一鳥於房前樹上鳴。卜人云。是鳥所止。為不祥。弼聞之。恐懼。思欲崇修功德。未知何者為勝。夜夢一僧稱讚金剛般若。令誦百遍。及寤。依命即誦滿其數。忽有大風從東北來。拔樹遙擲巷外。其根拔處。土坎縱廣一丈五尺。乃知經力不可思議。

唐僧慧因。善三論及法華金剛經。常為講說。至德中。黃昏時見一人入門。云王請法師。因遂僵仆。唯心頂煖。七日却蘇。云初隨使者至一城。極甚宏麗。入見王。從數百人下殿。至閣門拜曰。弟子不幸。主世名祿。兼治罪人。甚用為咎。聞上人善講金剛經。幸為敷析。於是就坐講畢。王施絹三百匹。遂令送歸。次見一講堂。有百餘僧。相與談論。初極禮法。少時各爭競。於手指上。悉生鐵爪。共相拏捫。血肉塗地。牛頭巨卒。以火燎之。盡成灰粉。湏臾又復本身。因驚懼。却蘇。蹙然而起。絹已在櫃。與前數同。遂得此施作功德。自此更不講說。惟持經而已。

唐釋道濟。西蜀成都人。武德中。濟善質。有萬餘緡。自京還歸。道遇新益州戶曹常約。欲赴任。少路費。就濟借數百千。到綿州。夜與渡江。至中流。令從者縛濟以籠。盛沉水中。盡分其財。濟有戒行。常持金剛經。雖在洪波。水不入口。俄頃。如有神力。籠浮縛解。漂著小洲。時方夜半。村人遙見洲上有光。即棹小舟來視。濟因得活。時竇公執為都督。濟往訴之。公約詰責。全不承認。濟為竇藏。在簾下。卷簾以示之。約頓首請罪。濟告願放。於是不問。約泣涕悔謝。終身皈向佛經。

唐貞元中。尼道凝。常持金剛經。住上都龍華寺。曾往莊嚴寺。參請貞操禪師。門人止之曰。和尚不面女人。難以引進。道凝泣涕自謂曰。我修行有日矣。願集其福。再生為男子身。不月餘。忽一日沐浴。舍人以硃書其脚下。為願生字。便奄然而逝。後感夢於徒弟曰。我於金城坊張濟家作男子。七月一日當生。至期來訪。以硃字為憑。夢者覺異。遂記于壁。至期往訪張家。果生一男。請視其足。有願生二字。甚分明。張氏因以命名。五歲。携謁貞操禪師。具述其因。師曰。宜令出俗。後為師徒弟。

唐子昶。天后朝。任并州錄事參軍。每至一更後。即喘息流汗。二更後方愈。妻柳氏將召醫。昶密曰。自無他苦。但晝決曹務。夜判冥司。力不任耳。每知有災咎。即陰為之備。都不形言。凡六年後。丁太夫人艱。乃持金剛經。更不復為。真吏常讚歎此經功德浩大。令子孫諷誦。後為慶州司馬卒。年八十四。臨終。忽聞奇香。非世所有。謂左右曰。有聖人來迎我往西方去也。言訖而沒。

唐張玄素。洛陽人。年二十持金剛經。天授初。任黃梅縣令。凡有厄難。皆獲免離。七十遘疾。忽有華蓋從空而至。澡浴與家人訣。奄然而卒。

唐帝克勤。少持金剛經。為中郎將。從軍伐遼東。遂陷高麗。貞觀中。太宗征遼。克勤望見官軍。乃夜出投之。闇不知路。至心念經。俄見炬火前導。遂達漢軍。

宋淳熙十四年。歙縣宰虞奉議。杓遣廳吏呂明往嚴州。歸塗值一客。亦負擔。元不相識。即顧揖如舊交。凡四五日間。其行或在前或在後。一日呂常食。必招與共啜。但見其追逐不捨。頗疑焉。及投宿村店。取腰篋中所藏猪

券十餘道置席下以防其竊。明早啓戶遇此客前問曰：爾平生何善緣？呂曰：我小人耳，有何善可說？客曰：我相隨許時，本不是好意，望爾身畔料必有財物，欲為不利。夜來鑽壁覷，乃覩一人長七八尺，面貌全似神道，瞪眼看我，我不覺驚倒，又不敢叫人相救，此何祥也？呂曰：每日天未曉時，課誦金剛經，如今十年矣。客愧悚，異謝而去。

唐元和初，九江有一村叟，鬻薪於市，年近七十餘，常持金剛經。至晚欲歸江北，中流風暴，同舟皆溺，唯此一人獨浮水上，飄至南岸。岸邊皆巨商之船，人皆見其背上有光，高數尺許，意其富貴人也。既見其抵岸，爭以衣飯遺之，與語方知一村叟耳。因詰其光，則云：我讀金剛經五十年矣。在背者乃經也。前後或遇厄難，無不獲免。

唐臨安陳哲者，家住餘杭，精一練行，持金剛經。廣德初，武康草賊朱潭寇餘杭，哲富於財，將船移產避之。尋而賊至，哲謂是官軍，問賊今近遠，群賊大怒曰：何物老狗，敢辱我？爭以劍刃刺之。每下一劍，則有五色圓光徑五六尺，以蔽哲身，刺不能中。賊等驚歎謂是神人，莫不慙悔，捨之而去。

元魏楊體幾延和二年為饒州長史本州有出銀山採戶居者甚衆往往並是草屋其年秋值大風起民居焚燹俱盡長史親往撫問忽見一家獨存略無損動遂問其故一老者出云累世奉佛舉家持金剛般若

元魏天和五年梓州人倪勤以武略稱因典涪州涪上有倉名興教勤嘗主之素持金剛經有廳事面江甚為勝槩乃設佛像於下讀經于前其年六月九日涪水漲唯不至此廳下勤讀誦益勵暨水退周視數里屋室盡圯唯此廳不露漬倉亦無傷人皆禮敬

五代王令望少持金剛經遊邛縣臨溪路極險阻忽遇猛獸震怖非常唯專念經獸熟視曳尾而去流涎滿地曾任安州判司過楊子江夜遇暴風起租船數百艘相接盡覆唯令望船獨全蓋令望于時念經不輟

唐崔善冲先天初任梓州銅山丞雋州刺史李知古奏充判官諸蠻叛殺知古善冲等二十餘人奔走擬投昆明夜不知道善冲專念金剛經俄見炬火在前眾便随之至晚火滅遂達其所

唐僖宗天授初任懷州武德令常持金剛經至河陽水漲橋倒日已夕人

爭上船岸遠未達欲沒漂惶恐且急念經湏臾近岸遇懸蘆攀緣得出餘溺死八十餘人。

唐崔文簡先天中任防州司馬屬吐蕃作亂奄至城下因被掠去鎖之甚固至心念經三日鎖忽自解虜疑有奸箠窮問汝有何術荅曰念金剛經復令鎖之念未終卷又解衆皆歎異遂送出境。

唐唐晏梓州人持金剛經日課七遍開元初避事普州安樂縣與人有隙讒於使者劉肱肱使人捕捉晏夜夢一胡僧云急去急去驚起便走遂州義方縣肱使人掩至奔走無路遂一心念經捕者交橫並無見者由是獲免。

唐元和中江陵岑陽鎮將王沔常持金剛經因使歸州勘事至宅灘船破五人同溺沔初入水若有人授竹一竿隨波出沒至下牢鎮著岸視手中所執乃所持金剛經也宅灘至下牢相去凡三百餘里。

唐長安縣死囚入獄四十餘日誦金剛經未嘗輟口臨決脫枷枷頭放光長數十丈照耀一縣今奏聞玄宗遂釋之。

唐永泰初。豐州烽子暮出。為党項縛入。西蕃易馬。蕃將令穴肩貫骨。

索以馬數百蹄配之。經半歲。馬息一倍。蕃將賞以羊革數百。因轉近牙。

贊普愛其了事。遂令執蘇。左右有剩肉餘酪與之。又居半年。因與酪肉。悲

泣不食。贊普問之。云有老母。頻夜夢見贊普。頗仁。聞之。悵然。夜召帳中語

云。蕃法嚴。無放還例。我與爾馬兩疋。於某道縱爾歸。無言我也。烽子得馬

極騁。俱乏死。遂書潛夜奔。後為刺傷足。倒磧中。忽風吹物。窅窅過其前。因

擘之。裹足。有頃。不復痛。試起步。驟如故。經信宿。方及豐州界。歸家。母尚存。

悲喜曰。自失。爾後。唯念金剛經。寢食不忘。專祈見你。今果如願。因取經看。

中間。不見數紙。烽子道中。傷足不能行。經中神以經紙救之。視瘡上。乃經

紙也。瘡亦隨愈。

唐南康王常阜鎮蜀時。有左營伍伯在西山行營。於同火卒學念金剛經。

性頑。初一日。纔得題目。其夜堡外拾薪。為番騎縛去。行百餘里。乃止。天未

明。遂暗之於地。以髮繫轡。覆以毡。覆寢其上。此人唯念經題。忽見金一鉞。

放光止於前。試舉首動身。所縛悉脫。遂潛起。逐金鉞。走計行未得十餘里。

遲明不覺已至家。家在府東市。妻兒初疑其鬼。具陳來由。到家五六日。行營將方申其逃。初常不信。以逃日與至家日不差。始免之。

唐建德縣李惟燕。少持金剛經。天寶年為餘姚郡參軍。秩滿北歸。過五丈店。屬上虞江埭塘破。水竭。時中夜晦暝。四迴無人。此路舊多劫盜。惟燕舟有吳綾數百。懼為賊劫。因持劍去船頭誦經。三更後見堤上兩炬火自遠而至。惟燕疑是村人衛己。去船百步許。又復迴去。心頗異之。其誦經愈厲。因思其火得非經力乎。時塘水竭而外塘水多。惟燕一心願塘破。當得水來行舟。中夜後聞船頭有流水聲。久之船浮。及明視之。果外塘發一穴。水流奔迸。乃知經力如是浩瀚。惟燕弟惟玉。任虔州別駕。見兄誦經有功。因效之後。泛舟出峽。水急艣折。舟甚危亟。惟玉專心誦經。忽見一艣隨流而下。因得之以濟。其族人亦常誦此經。遇安祿山之亂。伏於荒草。賊將至。思得鞋著以支。俄有物落其背。視之乃鞋也。

五代杭州人吏徐玘。每日五更常誦金剛經三卷。方入公門。其家甚富。忽一日有劫賊百餘人至其家。將闔門大小盡用麻繩縛之。仍以玘縛在箭

梁上。玳心中云。金剛不壞身。今如之何。須臾見一尊佛現。憂心便釋。衆賊各放箭射之。屢發不中。玳身衆賊驚歎。問玳有何幻術。答曰。無術。每日但念金剛經。想是佛力龍天護衛。有此感應。衆賊合掌驚悟。併釋放之。

唐大曆中太原偷馬賊。誣一孝廉同情。考掠旬日苦極。推吏疑其寃。未具獄。孝廉唯念金剛經。其聲哀切。晝夜不息。一日有竹兩節忽墜獄中。轉止其前。他囚爭取之。獄吏恐截刃其中。劈開視之。內有兩行字云。法尚應捨。何況非法。書迹甚工。賊首悲悔。具述其誣。孝廉遂得脫。

唐永泰年間。張齊丘為朔方節度使。信向佛法。每日侵晨對聖像前看金剛經數卷。後因小將犯事。恐敗露。結託數卒持刀欲謀害齊丘。方至衙門。皆投刀於地。垂手開口。戰慄久時方甦。及問其故。乃云。見二神人長二丈許。瞋目來叱。皆如中惡。齊丘聞此。誓絕肉食。持誦倍常。

昔路州銅鞮縣人杜思訥。常持金剛經。勞病得愈。每至持經之際。必覩神光繞室。

宋德祐丙子。建陽之崇政。地名南窰。華家山有一老叟。姓華名友生。來好

誦金剛經。極有靈驗。手接衣領。自有金光燦人眼目。其年大元軍馬之來。華友以逃難之事。密禱于佛前。是夜金剛賜夢云。你前世因殺了一人。不曾償命。其人見託生建康。歷陽縣土名鷄籠山。姓王名二。今在大勢軍中。你當死於此人之手。我雖欲救爾。其如數何。今以相報。不必趨避。華友次日端坐佛前看經。不輟。近午有二人突入。將華友執了。華友告云。告取王二官人。我當死在你手。一死不爭。容我誦了一卷經。便得就死。軍問你何以知我為王二。華友以夢實告。所言鄉貫無一差舛。王二曰。既是你前生欠我命債。你須喫我一刀。遂以刀去其中。唱道殺了也。我今與你解冤釋結。令華友教之誦經。留衣服與之為別。纔越一月。華友以病而死。信乎數之不可逃也。但得免死於兵。得非金剛救護之力乎。

唐魏恂。左庶子尚德之子。持金剛經。初為右監門大將軍。時京師有蔡榮者。暴亡數日。方寤。云初至冥司。見一鬼使。被冥官嗔責。以追人不到。將撻之。鬼使云。將軍魏恂持金剛經。善神擁護。追之不得。即別差鬼吏去。頃更回報。其說亦然。冥官曰。且罷。追恂由此警勵。曰。加精進。後終睦。

唐蜀道白衛嶺多虎豹噬人。光化中有常秀才者。已中選調授巴南官。官
念金剛經。赴任至泥溪。遇一女人著緋衣。挈二子偕行。同登此山。前路嶺
頭。行人相聚叫譟。見此女人。乃赤狸大蟲也。逡巡與常分路而去。常終不
覺。蓋持經力也。

隋睦彥通曰。誦金剛經千卷。李密盜起。彥通率武牢邑人欲殺以應義旗。
通知之。遂投身下城。賊便拔劍逐彥通。通為迫急。躍入城隅深澗中。空虛
中忽見金剛神。指令一人接彥通右臂。置一磐石上。都無傷損。神人曰。汝
念經有感。特來相救。因此免難。其右臂上旬日聞香氣不絕。後官至方伯
八十九歲無疾。沐浴索筆書偈。端坐而逝。偈曰。八十九年在世。隨身做箇
活計。今日撒手便行。明月清風自在。

宋熙寧間。守邊一軍士。因遇寇敵戰敗。亡走失道。竄伏荒林。自悼曰。死固
不惜。不得待母之餘年。吾母持金剛經逾三十年。一旦兒有難。無神力為
助。言訖泣下。忽二大木葉墜前。有人曰。取之。乘之可禦荆棘。俄行頃覺脚
力倍常。凌晨乃至太原府。還家見母。及取葉視。乃母經之二葉夾耳。後詢

逃竄處至太原一千里。

梁青州人柴注為壽春府司理。鞠劫盜。有囚自言某離城三十里。開旅邸。每遇客旅有囊橐者。多殺之。投其尸于白沙河下。前後不知其數。惟謀一老嫗不得。柴問其故。因曰。頃年有老嫗獨携行李寄宿。某與兄弟言。今夜好箇經紀。至夜半遣長子推戶。久之。回云。若有人抵戶而立。不可啓。某怒不信。提刀自往。及門。杳無人聲。試穴壁窺之。見紅光中一大神。與房上下等抵門而立。氣象甚怒。某驚懼失聲。幾於顛仆。天將曉。門方開。老嫗正起。理髮誦經不已。問何經。曰。金剛經也。乃知昨夜神人蓋金剛也。

宋政和中。真州石匠孫翁。日誦金剛經三卷。忽一日帶三十餘人入山鑿石。山崩。盡陷其中。惟孫翁在石罅中得活。後經十二年。其子孫鑿石。穿透舊所。忽遇孫翁。端坐石孔中。容顏如故。子孫拜泣。問其所活之因。翁曰。常持金剛經。又問。飢否。翁曰。陷石之後。似有人持一油酥餅喫之。至今未嘗飢渴。翁又云。吾昔所持之經。今還在否。孫曰。見在佛厨內。翁因徐步還家。就厨中取經看。時只見經上有一圓孔。如當時油餅大小。方知此經有不

可思議功德。能救護孫翁飢餓垂死之患。

宋胡石壁作湖南憲。時寧鄉銀場數十人入土取礦。俄石落土崩。諸人皆驚出。獨胡三二郎父子歿焉。越二年。銀場爐主過其門。適其死之三週。其家命僧薦拔。爐主聞其故。大恨曰。彼父子實由我而死。今固無可奈何。但掘二骨出塋。可盡吾責。乃喚三百人掘之。先得一屍。復掘遇一大石。石中有小竅。僅可容拳。內有人聲。視之。則胡三二郎者。端坐其中。未嘗死也。諸人大駭。問其生故。胡曰。石崩之時。大石覆我於中。故得不為土石所壓。每日有白鼠負齋一隻。由竅而入。吾取以食。故得不死。諸人問其有何陰德。而致此。胡曰。吾平生皆無功過。但自幼日誦金剛經一過。雖極冗未嘗輟也。開石出之。面少如童。舁之至山下。則不復能言矣。爐主以為奇事。聞之於官。石壁以為妖妄。追到爐主。具荅以實。石壁不以為然。復舁胡三二郎以至石壁。命看汝金剛經。則經中七百餘字。逐一為鼠所旋。盡。衆方悟其石中所食之齋。即經中之字也。

唐東京開寶寺沙彌道蔭。常念金剛經。寶曆初。因他出夜歸。忽遇暴虎。中

路哮吼跳躑于前。蔭知不免。乃閉目而坐。但默念經文。心期救護。虎遂伏草間。守之達曙。村人來往觀虎蹲處。涎流滿地。

唐貞觀十七年。改文昌自荆入蜀。應南康王常臯辟命。洎常之暮年。為劉闢讒構。遂攝尉靈池縣。常尋卒。劉闢知留後。文昌舊與闢不合。聞之。連夜離縣。至城東門。闢尋有帖。不令諸縣官離縣。其夕陰風。及返離郭二里。見火兩炬夾道百步為導。初意縣吏候迎。恠其不前。高下遠近不差。欲及本縣方滅。及問縣吏。尚未知府帖矣。時文昌念金剛經已五六年。數無虛日。信乎至誠必感。有感必應。向之道左右火。乃經所著跡也。後闢逢節漸露。詔以袁滋為節度使。文昌從弟少從軍。知左營事。懼及禍。與監軍定計。以蠟丸帛書通謀於袁。事旋發。悉為魚肉。闢謂文昌知其謀。於一時念經夜久。不覺困寐。門外悉閉。忽聞開戶而入。言不畏者再三。若物投案。爆然有聲。驚起之際。言猶在耳。顧視左右吏僕皆睡。俾舉燭四索。初無所見。向之門扃已開闢矣。文昌受持此經十萬餘遍。徵應孔著。劉闢欲誅文昌。時朝廷命將討闢。文昌遂得免禍。

唐龍朔中。白仁哲為虢州朱陽縣尉。蒙差運米遼東。過海忽遇惡風。四望昏黑。仁哲與合船人從八十二人盡皆憂懼。仁哲平昔好佛。當時焚香看誦金剛經。未終卷。忽如夢寐。見空中有一梵僧。身放五色光明。謂仁哲曰。汝等八十餘人。宿有惡業。因緣今日俱當沒溺海中。數內緣汝平日持經功德。玉帝有勅。徧告龍王水府神祇。皆得免此橫逆之禍。吾特來報汝。勿致憂疑。須臾風恬浪靜。八十餘人俱得濟岸矣。

唐主待制。船至漢江。阻風波濤洶湧。船驚惶。遂將平日持誦金剛般若經一卷。拋棄江中。遂得風浪平靜。待制惟日深憶此經。受持年遠。鬱鬱不樂。經涉兩月。方到鎮江。見舟尾百步許。有一物似毬之狀。出沒無時。衆疑其異。待制差人喚漁人取之。乃螺蛸輒成一團。剖之外濕內乾。待制用手分開視之。乃是向日所拋之經。毫髮無損。待制驚喜拜受。愈加精進。

唐乾元年中。廣州僧虔慧。自幼受持金剛經。寒暑不易。因與緇俗數十人。泛海往南安都護府。忽值風濤大作。打壞船隻。溺船人俱沒海中。唯虔慧在浪中。遇一叢蓬蒿。自身斬至蓬蒿之上。道長三日三夜。方得濟岸。仔

細視其蒿中。乃見金剛經一卷。並無淹濕。虔慧拜受。此經精誠。供養日夜。受持。年至百三十歲。端坐告終。其經本自出香烟。漸成五色雲氣。徐徐上昇天界。

唐崔昭為壽州刺史。有一健兒犯極刑。處決之際。差官吏押往市曹處斬。連施三刀。其刀自折。刺史問健兒曰。汝有何術。荅曰。無他術。平昔專心持誦金剛般若經。遂差人取經來看。及開函視之。乃見經本已作三段。痕跡分明。刺史視之。合掌歡喜讚歎曰。嘗聞此經有不可思議功德。今果若是。遂免其罪。健兒求出家為僧。刺史即施度牒。

唐僧靈幽在京大興善寺出家。長慶二年暴亡。已經七日復生。云二使者引見閻摩大王。問幽在世習何行業。幽對曰。貧僧一生常持金剛經。大王合掌賜坐。命幽朗誦一遍。地獄煎熬擗楚之苦。一時停息。再問幽曰。念此經中。而少一章。師壽合終。今加汝壽十年。歸世勸人受持此經。真本在濠州鍾離寺石碑上。幽既還魂。具奏朝廷。差中使往濠州碑上看驗真本。此章無法可說。是名說法。後增爾時慧命須菩提。至如來說非衆生。是名衆

生是也。

唐永徽元年。僧明濬暴死。蘇云。見二青衣引至冥王。問一生何業。荅曰。誦金剛經。王曰。善哉。若誦十萬遍。明年必生淨土。乃放還。至二年三月卒。寺衆咸聞異香。

宋淳熙元年。揚州府承局周興。自幼日誦金剛經一卷。公私不易其心。嘗承太守莫濛差興賣幣帛香燭壽禮。約有一千餘貫。往行在。送朝貴生日。行至瓜洲渡客店。郁三家投宿。其夫妻見承局行李重貨。喚兄郁二謀意。商量夜至三更。入房將周興潛地打殺。離店五里許。埋在路傍。行李財物盡行劫已。緣承局過限。回劄文引。杳無所歸。其妻子被官府兩次監禁杖限。候經一年。實難追獲。後因太守被召赴行在。一行人從起程。未及到瓜洲渡。尚有五里許。忽有一朵蓮花攔在路上。太守令從者折之。刀斫不斷。遂搖至四五尺。只見一死人。其蓮花從口中出。衆人愛護取看。時尚自眼動。再三熟視。却是周承局也。取到人家。以粥徐徐調理。次日方能言語。云

得日前持誦金剛經。力被埋在地。如夢中見有一金剛神。將一朶蓮花。插在周興口中。至今不覺飢渴。太守合掌讚歎云。嘗聞此經有不可思議功德。遂釋放周興妻子。立差人追郁二。郁三。究問明白。重杖處死。

宋霍參軍誦持金剛經。忽見廳下地裂。湧出一神人。稱吾是速報司。參軍問速報司曰。報惡不報善。善者受飢寒。惡者豐衣飯。清者難度日。濁者多榮變。孝順多辛苦。五逆人愛見。速報司唯當靈不靈。唯當現不現。既靈。顯靈既現。須教現。願賜一明言。免使閻浮衆生怨。答曰。吾掌速報司。非是不報惡。非是不報善。善者暫時貧。惡者權飽暖。濁逞曲惡輩。報案盡抄名。第一抄名姓。二除福祿神。三教絕後代。四遣禍星臨。五使狂心計。六被惡人侵。七湏壽命短。八報病纏身。九遭水火厄。十被王法刑。如此十苦難。盡是十惡人。參軍休問我。照鑑甚分明。一朝天地見。萬禍一齊臨。詩曰。湛湛青天不可欺。未曾舉意早先知。善惡到頭終有報。只爭來速與來遲。霍參軍再問速報司。陽間有僧尼善友及士夫黎庶。有受持金剛般若經之人。將來百年命盡。死入幽冥。得超昇否。答曰。果得超濟。

唐元和三年李同捷阻兵滄景帝命劉祐統齊德軍討之初圍德州城城堅不拔翌日又攻之自卯至未傷十八九人竟不能拔時有齊州衙內八將官王忠幹博野縣人長念金剛經積二十餘年日數不缺其日忠幹上飛梯將及堞中箭如蝟為樞木打落同火卒拽出於城外置之水濠裏岸祐見日西遂收軍其時城上矢下如雨衆軍忽忙取忠幹歸忠幹將死忽夢至荒野遇河不能渡仰天而哭忽聞空中語聲忠幹見一人長丈餘疑其神人指示其路其人云你莫怕我令汝得渡忠幹拜之低頭未舉神人持忠幹腰將一炊久方著地忽如夢覺聞城頭已二鼓矣亦不知其傷痛握手捫面血塗眉睫方覺敗陣乃舉身強行百餘步再倒去復見前夢中長人持刀叱曰起忠幹驚忙又走一里餘坐歇方聞本軍喝號遂及本營始知夢中渡河乃水濠也軍中就醫得活

唐馬總貞元初嘗為邕管戴叔倫從事先是南海節度都制五嶺連帥李復有用事昏馬生叔倫自以文章任已不修巡屬之敬叔倫又不長吏事

凡五管皆有遺遺馬生蜀人此體殆絕故為復案復又與總有詩酒之

好擢奏為南海從事。有日者謂叔倫曰：「中丞有馬厄，已成宜慎之。」叔倫由是不乘馬。每出輒乘肩輿。無何為賓客所訕，謂總陰持邕管之事。密獻連帥以背叔倫，故復案深也。叔倫抱恙而歿，總亦不能自明。囂囂然甚招物議，聲達於朝。貞元末，閩帥柳公冕深嫉之。是歲總貶泉州司戶。冕以為得之，將加諸法。遂密疏其罪，請殺之。總素與監軍善，自被幽繫，音問莫通。及期以秋分當寘總於法。總計已盡，甘其鼎俎。忽夢一人不見其首，長七尺，空中有言讀七遍事當得白。明日聞獄外人吏喧喧，則曰：「中丞遘疾，圓扉之內，屣步於缺墻塵中，得金剛經一卷，總心悟之，乃讀七遍。未及秋分，冕竟卒。監軍緩其獄，覆奏，總遂獲全。」元和已來，三擁節旌，出入榮秩，可為盛矣。

唐時有一富商，恒誦金剛經。每以經卷自隨，嘗賈販外國，夕宿於海島。眾商利其財，共殺之，盛以大籠，加巨石并經卷沉于海。平明眾商船發，而夜來所泊之島，乃有僧院。其院僧每夕則聞人念金剛經聲，深在海底。僧大異之，因命善泅似由者沉于水訪之。見一老人在籠中讀經，乃牽挽而上。

僧驚問其故。云被殺沉於水。不知是籠中。忽覺身處宮殿。常有人送飲食。安樂自在也。衆僧聞之。普加讚歎。蓋金剛經之靈驗。遂授僧削髮出家於島院。

宋政和間。太平州脩利國圩。工徒甚衆。忽有鴉千數。噪集于別埂之傍。主役者異之。使人驗視。乃一役夫已斃。而鴉銜土以覆之。蔽瘞幾半。又令啓土。於死者胸臆間。得小卷軸。乃金剛經也。衆莫不敬歎。為徙諸高原。歛而葬之。舊事多有此比者。

唐大和五年。漢州什邡縣百姓王翰。常在市日逐小利。忽暴卒。經三日却活。云冥中有十六人同被追。十五人散配他處。翰獨至一司。見一青衫少年。稱是己姪。為冥官廳子。遂引見推典。又云是己兄。貌皆不類其兄。語云。有冤牛一頭。訴爾燒畬。枉壞其命。爾又曾賣竹與殺狗人。作筵篋。殺狗兩頭。狗亦訴爾。爾今名未注死籍。猶可以免。爾為作何功德。翰欲為設齋。及寫法華經。金光明經。皆曰不可。乃請曰。持金剛經七遍與之。其兄喜曰。足矣。及告家。舍業出家。終身為善。不殺牛犬。

帝當夜四更忽見兩使者追入冥府引見閻摩大王勅曰汝壽合至七十九官至樞府緣汝奏劄於國損民汝當絕祿除筭馮驚愕俯伏告曰臣既陽壽未盡乞賜再生誓當畢世持經常行陰騭不造罪愆有犯天律王憫其回心向善放回陽間再三誡諭曰凡掌權政可置簿一面日間作事夜必書之既不可書必不可作此延年之術也纔舉一善惠民恤物增延福壽若用刻剝之心上帝惡之則促壽減祿馮得再生日行方便利國利民陰德日著官拜丞相壽至九十八忽一日卧疾有第九子出至廳堂前忽見階下列無數牛頭馬面獄卒子問諸鬼曰何緣來此鬼吏荅曰吾等特來迎接閻摩大王其子驚惶哭入堂內以所見白父丞相笑而撫掌曰生為上柱國死作閻摩王是吾職也索浴更衣朝衣坐化

唐并行立陝州人不識一字長慶初常隨善友口誦金剛般若經時或為商凡身到處即奉經本用錢三百餘貫買疋帛往他州貨賣經過峻嶺撞見強賊數人各持刀仗來趕行立箱篋約重五十斤急棄之竟投嶺下深

淵側避。忽見空中有一金剛神。以手指行立。只覺身在水面上。如行平地。衆賊見箱袱。遂即取之。及舉。甚重不能起。賊皆驚異。招手喚行立曰。上嶺來。我若殺你。如殺我等父母。行立即上來。賊再三扣問。汝有何幻術。答曰。非有幻術。恐是平日專心持誦金剛般若經。爲佛神力感應。故有斯靈異。賊遂令行立開箱視之。乃見五色光明現於其上。衆賊皆合掌悔過。遂以一百貫文與行立贖經。前去受持。衆乃發願棄鎗刀。更不作賊。俱改惡從善矣。

宋潮州城南屠戶陸翁。年二十三歲時。門前見一雲水僧。稱教化有緣人。陸不願解。僧云。汝殺猪羊。不計其數。何不改業。陸曰。承襲祖業。不忍棄捨。僧云。汝若不改。後世必墮此類。仍被他殺。冤冤相報。無有出期。貧僧觀汝宿有善根。何不受持妙法。蓮華經及金剛般若經。汝若受持。消除惡業。增長善福。豈不見我仁宗皇帝御讚蓮經云。六萬餘言。七軸裝。無邊妙義。廣含藏。溢心甘露。時時潤灌。頂醍醐。滴滴涼。白玉齒邊流。舍利紅蓮舌上放。毫光發。燒造罪如山。盡。只消少去兩三寸。曾言乞食。頂不見。牽緣。省吾思。

十已上。十五已下。乞丐貧人入本家養濟院。每日給米一升。錢十五文。至二月初三日。已滿一季。令其自便求趁。三。普施應驗湯藥。救人疾苦。四。施棺木。周急無力津送之家。五。有女使不中使喚。不計身錢。量給衣資。從便改嫁。六。旬處於世。專一戒殺。救護衆生。遇有飛走物命。買贖放生。七。每遇荒歉之年。其糧食貴。余賤糶賑濟貧民。八。應有寺觀崩損者。為修理之。聖像年深剥落者。為裝飾之。或橋梁道路溝渠不通者。咸為治焉。九。有遠鄉士夫客旅流落者。斟量遠近。以助裹糧。而周全還鄉。十。旬忝居推司。凡遇冤枉。必與辯明。常推已及物。濟人之急。救人之危。感動穹蒼。賜旬男今日奪天下都魁。皆因旬平昔奉公行善之所致也。豈敢捨公門退職。而自求安逸耶。

唐京兆殷安仁。家富。日誦金剛般若經。初隋義寧中。有客寄其家。停止。客盜他驢於家殺之。驢皮遺安仁家。至貞觀三年。安仁遂見一人於路。謂安仁曰。追汝使明日至。汝當死也。安仁懼。徑至慈門寺。坐佛殿中。經宿不出。明日果有三騎并步卒數十人。皆兵仗入寺。遙見安仁。呼出。安仁不應。而

念誦逾進。鬼相謂曰。昨日不即取。今日脩福如此。何由可得。因相與去。留一人守之。守者謂安仁曰。君往日殺驢。驢今訴君。使我等攝君耳。終須共對。不去何益。安仁遙荅曰。往者他盜。自殺驢。但以皮與我耳。本非我殺。何以見追。倩君還為我語驢。我皆不殺汝。然今又為汝追福。於汝有利。當捨我也。此人許諾曰。驢若不許。明日更來。如其許者。明日不來矣。言畢而出。明日遂不來。安仁於是為驢追福。而舉家持戒。菜食云耳。

唐豫章有熊慎者。其父江鄉捕魚為業。嘗乘小舟。飄游為樂業。慎父自詠曰。沽酒遠村香更好。就船鬻鯉味偏長。短簑只恐薰葭濕。小艇唯愁菡萏傷。遣興任歌無曲調。忘情品笛按宮商。有時只與樵夫話。閒論人間事一場。一日下網得魚甚多。滿載舟中。未及入市。夜宿於舟中。忽聞歌曰。夜靜天寒月正明。倚船高卧聽江聲。未聞山寺鐘聲動。誰向江邊舉佛名。慎父恠之。出船却不聞之。自謂是夢。再欲眠。又有十人念佛經。而細察之。乃是船中諸魚也。熊慎歎曰。蠢動含靈。皆佛性。我今以此為生計。非善業也。

舟魚盡放入水中。歸家與子真。改業鬻薪。詠曰。世云樵子與魚公。養濟誰

同道不同更不傷生。離縲水却携斤斧。近高峰。然辛苦無殺生之過。嘗斲薪於石頭岩。窮苦至甚。一日暮宿江上。忽見沙中有光焰高丈餘。遂以斤斧掘之。得黃金數斤。明日詣市貨之。市人曰。此紫磨金也。酬鎚數十萬。蓋緣改業致富也。

宋僧法宗。臨海人。幼好游獵。嘗於剡川射中子鹿。忽墮胎生子。母猶啣箭舐子。宗悔曰。貪生愛子。有識皆同。遂摧弓折矢。斷髮為僧。分衛自資。日唯一食。六時禮佛。以懺往愆。常吟咏法華維摩二經。響聞四方。從受歸戒。凡三千餘人。開拓所住。以為精舍。因誦經為目。曰法華臺。

宋滄陽趙修復。元豐中。因故疾發動。恍惚如醉夢之間。見鬼神擁一綠衣一紫袍。乘馬揮鞭。俱來詣門。喊聲震地。呼修復速出。修復聞之。汗流被體。髮毛如拔。魂飛魄散。莫知所措。連聲逼迫。見鬼官衣綠者在左。衣紫者在右。衣綠者是崔府君。自言管生死事。衣紫者是已之伯父宗丞。自言管生死案牘。而二公語之云。修復在生。狂肆不軌。邪慢無道。縱心所欲。橫殺物命。衆生今來冤訴。云我等積罪。合墮旁生。所受生身。自有年限。儻業滿足。

當得為人。餘業未盡。橫遭傷殺。所報不終。復入惡道。往復既頓。重罹塗炭。痛苦銜冤。不能具陳。異口同聲。銜冤論對。令我大王平生理冤。為此等受。勅追捉汝身。事已彰露。更莫多言。於是修復被諸鬼神。赤繩繫手。白棒鞭身。唯聞喝急。不許辭家。修復自念平生鮮福多罪。心甚悚然。乃有一鬼拽倒而去。遂祈禱曰。某以凡夫處俗。未能崇敬為心。決料前程。向無依怙。甘從萬死。敢忘一生。若非真聖慈憐。衆冤何以面覲。幸伯父之親。加府君之故。惟冀哀恤。終思報德。於是府君謂宗丞云。修復乃公骨肉。又且悔過。深可愍之。既而二公轉惡。以為慈。謂修復云。汝能為所傷冤家。造玉皇大道君聖像。更朝夕能誦玉皇本行集經。念其名號。當獲福無邊。得免斯咎。修復聞之。至誠唯唯。不勝感感。便發誠心。克崇妙典。願諸冤等。早生人天。言訖。即到一城。二公引修復東北而立。見一大殿中有人。云是聖帝。衣王者衣。據案而坐。又見殿下罪人無數。皆被捶拷。號天哀慟。不可忍聞。修復尤切驚懼。頃間即被引過。聖帝見之。瞋目作色。大聲告勅云。召冤證事。獄卒

趙修復為殺生彌廣。今已懺謝。發心造玉皇本行集經一部。是諸冤等。以此功德。時刻昇仙。並隨勝力。皆生天界。其趙修復。即命再生。復歸人道。不得拘留。上帝符命。時刻奉行。聖帝歎曰。修復殺生雖廣。而懺罪情切。冥通上界。寫琅函寶韞。太上真詮。令諸冤等。各獲人體。既能如是。善莫大焉。可放令還。修復蒙帝旨放還。頓首再拜而退。修復辭帝已訖。便出城。忽如醉夢之歸。神復其體。家人唯見言詞紛拏。自忤自撲。昏懵不食。如是三日。得生。既而身活。覺身碎痛。如是一月方安。乃發心造像持經。歸誠大道。

昔有一婦人。於三生曾置毒藥。殺害子命。此怨家。不曾離於前後。欲求方便。致殺其母。遂託此身。令慈母至生產之時。分解不得。及至生下。不過兩歲。便即身亡。至第三遍。抱此孩兒。直至江邊。不忍拋棄。感觀世音菩薩。化作一僧。乃謂此婦人曰。此非是汝男女。是弟子三生前中怨家。以神通力一指。遂化野人之形。向水中而立。報言。緣汝曾殺我來。我今欲來報怨。蓋緣汝有大道心。常持佛頂心陀羅尼經。善神日夜擁護。故殺汝不得。我此

時既蒙觀世音菩薩與我受記了。從今後永不與汝為怨。道了。便沉水中。忽然不見。

宋龍泉萬壽宮道士潘夢庚。平生有道行。一日浴罷。倚窓寄傲。恍如醉夢。身到一所。若世之官府。官吏整肅。兵戟森嚴。至門首。見舊識李鑄馮曰。此陰府也。知宮安得至此。俄有一卒曰。大王願見道士。掖至庭下。王端冕中坐。面黑多鬚。真凡間所畫閻羅王也。王曰。你平生誦度人經。及九天生神章。祭煉有功。幽沉獲福。壽延一紀。吾所追者。吉州龍泉潘應庚也。於汝無預。追汝之卒。吾已繩之以法。汝可速歸。故鄉出至通衢。見一判官。携簿按轡從者十餘人。呵導而至。方側身回避。偷視之。乃鄉人郭浩堂知丞也。因長揖曰。知丞何得至此。荅曰。我在世公平正直。不欺於心。王命擢為掌祿判官。陰陽異路。機不敢泄。知宮既得旨延壽。放還故家。宜速回。若便少緩。則身非已有。辭退。忽有青衣推入坑水中。醒來。但見汗雨遍身。其瞑目已兩日矣。嗣是愈謹戒律。誦度人經。卒享高壽。

後周長元子孝治。可七歲成人。年十六。其祖喪。明三載。元恒憂泣。晝夜

經行。以祈福祿。復讀藥師經。云。盲者得視之言。遂請七僧。然七層燈。七晝夜。轉讀藥師經。每日行道。祝曰。元為孫不孝。使祖喪明。今以燈光普施法界。乞祖目見明。元永代闇。如此辛勤。至七日。其夜夢一翁。以金篦療其祖。謂元曰。勿憂悲也。三日後。祖目必差。元於夢中喜踊。驚覺。乃遍告家人。三日。祖目果差。

宋蔡州周二嫂。賣煎魚為業。年五十六。以心痛而死。其子法昌。於寶林寺作童行。紹興五年五月二十一日。忽夢其母。謂之曰。我三年在地獄中受苦。不得功德。為我誦太上救苦經千遍。可免。法昌於太平觀。求得其本。誦之數足。越二年。忽過趙九郎門首。趙有女招兒。二歲不能語。因見法昌。遽拽其衣大慟。父母驚異之。其女忽能言。指法昌曰。此我前生子周法昌也。我賴其救苦經之力。得生于此。法昌驚訝。常往來其家。瞻敬不衰。

宋建炎間。太平州寇陸德叛。燒劫居民。殺害官吏。蕪湖尉儲生。竄避不及。為賊黨縛去。德自臨斬之。已脫衣。德見其頂有毫光。三道出現。乃釋之。且令主邑事。付以倉庫。後盜平。用此策勲。改京官。宣城僧祖勝云。儲尉每日

誦圓覺經一部。觀世音菩薩千聲率以為常。以故獲果報。得免橫逆。

南齊何點。少時嘗病渴疾。積歲不止。永明十年。在吳中石佛寺誦維摩。於講堂書夢異僧授丸一掬。夢中服之。即愈。時謂經功所感。

宋程紹彭有女慶娘。及笄。慶元四年。初春。為瘡疹困重。至二月二日。氣結而絕。救療無計。唯撚火艾炷灸其頂。若燒木然。冥無所覺。夜將半。忽呻呼語人。有兩使送我回。可將紙錢與之。父如其言。又曰。未也。須一倍此數。別就一處焚之。少焉。益蘇。父扣所見對曰。初被兩使追入大官府。立於庭階。王者著黑衣。據按而坐。傍吏呈一引。王把筆簽押。勾倒。我悲哭云。我家貧。不曾受用過。當有何罪而抵此。王曰。各有定數。更貧於汝者也。著來。我曰。死亦不辭。所恨者二親生育之恩。未施報答。今反為之累。王舉一器相示。內有如山藥。截成錢子者三片。使我喫。俄一白髯翁附耳曰。此是迷魂藥。服之則生路永斷。不可復還。切不宜接。翁遂升殿。懇王曰。此女家好燒香。其父母誦北斗經。金剛經。不可以數計。行陰德。積善緣。他人莫能及。望特放赦。其禮甚恭。其辭甚切。王領首。取前引別判一行。差二急足送還。

梁道珍法師。天監中寓廬山。慕遠法師。精心淨土。異時夢中見十人舟舫浮海。問何往。曰。適安養國。珍曰。願得隨往。荅曰。一日之修。功超永劫。子未誦彌陀經。未曾浴僧。何可求往。珍乃大設沐浴。專誦彌陀經。後二年有捧銀臺至者。曰。以法師之功。當得金臺。奈何始心猶豫。故止此耳。珍曰。苟見佛之基。有漸。奚必金臺。後亡之夕。所居山崖烈火千炬。鄉民大驚。旦則知珍遷化。

唐崔明達。小字漢子。清河東武成人也。祖元獎。吏部侍郎。杭州刺史。父庭玉。金吾將軍。冀州刺史。明達幼於西京太平寺出家。師事利涉法師。通涅槃經。開元初。齋後房中晝寢。及寤。身在簷外。還房。又移出。如是數四。心甚惡之。須臾。見二牛頭卒。悉持死人於房灸之。臭氣衝塞。問其所以。卒云。王欲相召。明達曰。第無令臭。不憚行。卒乃於頭中拔出其魂。既而引出城中。所歷相識甚衆。明達欲就告訴。則不可。既出城西。路逕狹小。俄而又失二卒。有赤索繫片骨。引明達行。甚親之。行數里。骨復不見。明達惆悵獨進。僅至一城。城壁毀壞。見數百人鎔鐵補城。明達默然而過。不敢問。更行數里。

又至一城。城前見卒吏數十人。修方丈室。有緋衫吏呵問明達。尋令卒吏推明達入室。累塹塞之。明達大呼枉。吏云。聊欲相試。無苦也。須臾。內傳王教召明達師。明達隨入大廳。見白面少年可二十許。階上階下。朱紫羅列。凡數千人。明達行入庭。竊心念王名。我不下階。忽見王在階下。合掌虔敬。謂明達曰。冥中添要陽地功德。聞上人通涅槃經。故使奉迎。開題延壽。明達又念欲令開講。不致塔座。何以敷演。又見塔座在西廊下。王指令明達上座開題。仍於塔下設席。王跪。明達說一行。王云得矣。明達下座至庭。王令左右送明達法師還。臨別。謂明達可為轉一切經。既出。忽於途中見車騎數十人。云是崔尚書。及至。乃是其祖元獎。元獎見明達不悅。明達大言云。已是漢子。阿翁寧不識耶。元獎引至廳。初問藍田莊。次問庭王。明達具以實對。元獎云。吾自沒後。有職務。未嘗得還家。存亡不之知也。尋有吏持案至。元獎開理。明達竊見籍。至明達名云。太平寺僧嵩山五品。既畢。元獎問明達得窺否。明達辭不見。乃令二吏送明達詣判官。令兩人送還家。判官見不甚禮。左右數客云。此是尚書嫡孫。何得以凡客相待。判官乃處分。

二吏送明達曰。此輩送上人者。凡五六輩。可以微貶勞之。出門吏各求錢五千。吏云。至家宜便如其數焚之。吾等待錢方去。及房見二老婢被髮哭。門徒等並歎息。明達不識其屍。但見大坑。吏推明達於坑。遂活。尚昏沉。未能言。唯累舉手。左右云。要焚紙錢否。明達頷之。及焚錢訖。明達見二人各持錢去。自爾病愈。初明達至王門。見數吏持一老姥至。明達問所居。云是鄆縣靈巖人。及入王怒云。何物老婢持菩薩戒。乃爾不潔。令放還。可清潔也。及出。與明達相隨行。可行百餘步。然後各去。明達疾愈。往詣靈巖。果見其姥如舊識也。

後唐董吉。於潛人也。奉法三世。吉尤精進。恒齋戒。誦首楞嚴經。村中有病。輒請吉讀經。所救多愈。同縣何晃。亦奉法。卒得重疾。醫弗效。晃兄惶遽。馳往請吉。董何二舍相去六七十里。復隔大溪。五月大雨。晃兄初渡時。水尚未至。吉與期。設中食。後同往。而山水暴漲。不復可涉。吉不能渡。遲迴歎息良久。吉既信直。必欲赴期。乃惻然發心。自誓曰。吾救人苦急。不計軀命。冀如來大士當照。乃誠便脫衣。以囊經戴置頭上。徑入水中。量其深淺。乃應

至頸及吉渡。纔至膝耳。既上岸。囊經已失。甚悲恨。尋至晁家。三禮懺悔。流涕自責。俛仰之間。便見經囊在高座上。吉悲喜取看。浥浥如有濕氣。開囊視之。經無少損。遂為誦經。其疾即愈。吉家西北有山高險。中多妖魅。犯害居民。吉以經戒之力。欲降伏之。於山際四五畝地。手伐林木。構造小屋。安設高座。轉首楞嚴經百餘日。寂然無聞。民害稍止。後有數人至。與吉語言良久。吉思惟非於潛人。窮山幽絕。何因而來。疑是鬼神。乃謂之曰。諸君得無是此中鬼耶。荅曰。是也。聞君德行清肅。故來相觀。并請一事。想必見聽。吾世有此山。遊居所託。君既來止。慮相違冒。恒懷不安。今欲更作界分。當殺樹為斷。吉曰。僕貪此靜寂。讀誦經典。不相干犯。方喜為此。願見祐助。鬼荅曰。亦復憑君。不侵剋也。言畢而去。經宿所焚地四際之外。樹皆枯死。如焚焉。

宋台州海壖有漁者。死信宿而活。云被人追往一處。入院宇中。見先舅氏在其間。似為世之曹吏。謂漁者曰。追者誤矣。姓名同爾。呼追者曰。是温州界某乙。速押斯人回去。當別之際。謂曰。舅在此甚驅馳。歸為我言之。可造

榜嚴經救拔。餘無所要。又戒之曰。爾之業不善。明年當死。還世可改求衣食。學誦經典。庶可延壽。良久。有人報上司有帖下云。來歲在戊子。諸道兵起。惟江南疫死數千人。處分水府減魚料一百萬頭。追者促行。回至所居。驚覺。遂甦。至次年果如帖下云。漁者乃為行者。日誦不輟。後十年而死。五代。馮載自言常患風氣。一夕門外有人喚馮載者。遽出門。見一紫衫銀帶類親事官者。云勾追你。馮不覺從而隨之去。轉一街。又逢一人親事官。云急勾。馮曰。我病不能行。二人曰。我扶你行。至一大衙門。已有親事官三十人。後有丈夫婦人小兒。皆露頭散衣啼哭不止。馮見之。忽驚駭曰。我死矣。奈何。斯須擁過第三重門。有廳事兩廊。每間各有司吏罪人三五人。忽然下簾。於簾下有人問姓名。馮亦記其一二。復見裏軟脚幞頭二三十人。從廳後而出。各執黑漆棒立於廳下。悉喚罪人至廳前。小男小女婦人在前。丈夫在後。從頭驗事。問訖。次到馮。問曰。多少年幾。甚年甚月甚時生。馮悉對之。東廊下有一吏持公案簿曰。同。又問曰。曾作何功德。曰。從十二上念天童護命經。主判曰。某年某月收得功德。凡經數處皆一同。亦對問。

如前又至一處。馮見寫四五紙文字。一紙曰。都勾院。一紙曰。送地戶院。一紙曰。風門院。一紙曰。送人門院。一紙曰。送鬼門院。又至一處。見主判者。眉多鬚。一手按膝而坐。馮熟視之。則宰相王隨。遂告之。不聽。勅一吏令將筭子來與筭之。即曰。與你筭子了也。二吏送出。過一陂。逢其亡兄。五木具體。形容憔悴。曰。知汝來。可分與我功德。又聞屋中哭聲。乃先亡妻也。亦乞功德。馮欲與妻語。二吏曰。不可。恐恩愛相戀。遂催行焉。馮曰。送我何往。曰。送往北御園去。既入園。上水閣。倚欄方食。忽欄壞落水。遂蘇矣。

唐孟知儉。并州人。少時病忽亡。見衙府如平生時。不知其死。逢故人為吏。謂曰。因何得來。具報之。乃知是冥途。吏謂儉曰。君平生無修福處。何以得還。儉曰。一生誦心經。及高王經。雖不記數。亦三四萬遍。檢勘得實。遂還。吏問欲知官乎。曰。甚要。遂以簿示之。云。孟知儉合運出身。為曹州參軍。轉登州司倉。即掩却不許看。遂至荒榛。入一黑坑。遂活。不知運是何事。尋有勅募運糧。因放選授曹州參軍。後秩滿。轉授登州司倉。又入選。除晉州判司。未至任而卒。

宋張守一者。襄陽人。有妻子。隆興元年。棄之學道。曰。誦真武經三卷。以貨藥行醫。自給。乾道四年。遊長沙。駐於小湖門道堂。嘗出至瀟湘門外。見舟中一人。招使上與語。曰。家間去此八十里。老母苦脚疾。踰年不能履地。醫藥無瘳。吾昨日因幹入城。夜夢一道人來用藥。随手見效。適覩先生容貌。蓋夢中所會者。豈非吾母宿生有緣。故得際遇。願邀幢節。迂顧不識可乎。張曰。吾雲水閑人。方欲微積功行。正所欲也。遂還堂內。挈衣笥復來。即解舟。夜半到彼處。迨旦。有十輩男子喜笑而迎。揖登岸。入舟人之家。延視病媪。張曰。小疾耳。無須慮。治之七日。媪步趨如常時。舉室歡賀。連夕樂飲。告去弗許。留連再旬。乃盛具將謝遣。繞一更後。忽有二十餘人喧噪自外入。即席擁張出門。穿踐山林。赴叢棘間古廟。解其髻髮。分髻繫于柱。束縛手足。張時被酒方醒。衣袴皆已脫去。但紙錢香灰狼籍滿地。自知必死。泣告衆人曰。守一方外細民。命如草芥。用以祭神。不辭乞為取。隨行諸物。一一焚燒。然後就燭。則死亦瞑目。其人許之。旋踵而至。凡其所齎。一切赴火。唯真武經存。張即冥心默誦。未數十句。覺廟中陡暗。燈燭盡滅。陰雲四合。聞

甲馬隊仗之聲。群山奔散。張繫髮自解。索縛亦斷。左右寂無音響。望盧林疾走。若有持炬導之者。天明到小塘市。不知所從來。僅逃性命。生理一空。初舟人用夜回程。正恐識其道徑。蓋素萌殺意。而張不覺。襄漢間傳笑呼為茶張。

昔荊州江陵縣尉李玄宗女。年十三歲時。夢見一梵僧謂女曰。汝有善根。何不持念金剛經。又云。世間若有男子女人。每日淨心能誦一卷。陽間增延壽筭百年。命終即生天界。若能究竟般若。直到涅槃彼岸。或有看經。雖未圓就。死入陰府。不能拘錄。即判生富貴之家。受諸勝報。玄宗女依僧之囑。日誦三卷。年二十四歲。不願有家。忽患傷寒。三日而卒。有二使者引見閻摩天子。照勘其女無罪。及見女子頭上有佛顯現。王云。此女既有般若之功。即判還魂。臨放時。王囑曰。汝父有仇讎。遂使陽間先減二紀之壽。不久進入陰司對證。因汝父好將活魚切鱠。今有魚七千餘頭。狀訴索命。汝若不信。歸陽間問父。每夜夢見落在網中。日日頭痛。此是魚求報也。女得還魂。以陰府事逐一白父。其父聞之。驚惶無措。遂同女往天寧寺大佛殿。

內。齋僧百員。發願斷除葷酒。手寫金剛般若經四十九卷。寫經已畢。玄宗忽一夜夢見有數百青衣童子。俱拜玄宗。口稱我等昔日被君殺戮。各經陰府訴其宿冤。索君性命。今蒙寫經功德。我等咸乘善力。出離三塗苦趣。各得往生善道。君既釋冤。陰司復還原壽。又添遐筭。玄宗聞之。不勝欣喜。自爾持誦經文不輟。為善不廢。壽至百二十歲。無疾索浴告終。

宋俞氏二女。東莞曾城人也。元嘉九年。姊年十歲。妹年九歲。稟性慈善。信向經法。忽以二月八日。並入定去。三日而歸。粗說見佛。九月十五日。入定一旬。還作外國語。誦經及梵書。見西域沙門。便相開解。明年正月十五日。又皆入定。田間作人云。見其從風逕飄上天。父母號懼。祀神求福。既而經月乃返。剃頭為尼。被服法衣。持髮而歸。自說見佛及比丘尼。曰。汝宿世因緣。應為我弟子。舉手摩頭髮。因墜落。與其法名。大曰法緣。小曰法彩。臨遣還曰。可作精舍。當與汝經法也。女既歸家。即毀除鬼座。繕立精廬。夜齊誦經。夕中每有五色光明。流泛峯嶺。若燈燭輝煌。照映遠近。刺史常朗夫人聞其感應顯異。並迎供養。敬禮甚至。二女為之講華嚴普門諸品妙經。及

止觀與聞者皆得開悟。

晉僧慧遠。姓賈氏。鴈門樓煩人。聞釋道安講般若經。豁然開悟。遂與母弟
慧特同受業。精思諷誦。以夜續晝。遠神明英越。心與理契。大善講貫。後南
適荊州。居上明寺。大元六年。至潯陽。見廬山閑曠。可以息心。乃立精舍。以
去水猶遠。舉杖叩地。曰。若此可居。當使朽壤抽泉。言畢。清流涌出。潯陽亢
旱。遠詣池側。讀海龍王經。及諸品經呪。忽有神蛇從池而出。須臾大雨。歲
竟有秋。因名龍泉精舍。時僧慧永先居廬山西林。欲邀同止。而遠學侶寢
衆。永乃謂刺史桓伊曰。遠公方當弘道。而貧道所棲。隘不可處。時遠夢山
神告曰。此山足可棲神。願無他往。其夕大雨雷震。詰旦林麓廣闊。素沙布
地。梗枿文梓。充布地上。不知所自至。伊大敬感。乃為建刹。

宋平陽邑淨明院有閣梨有元者。課誦諸品經呪。而於大悲呪尤精。每夜
二更。即起持誦。日間多宴。或坐撫琴焚香而已。嘗講止觀于堂上。而簷間
鳥雀相喧。因下座與衆行道誦經呪。已而鳥雀皆去。自後佛殿法堂前後。
無復燕雀聲。又殿柱多為白蟻損蛀。元公乃行道殿中。誦經呪七晝夜。後

柱礎旁蟻皆移去。自此遂絕。

示衡邑紫蓋鄉一老儒。大德甲辰初夏。出邑中。既而以他幹亟遣家僮先歸。是夕繼亦旋返。抵暮獨趨江岸。喚渡。值操舟渡子俱各酣卧。殊不之顧。是夜空雲黦黠。月色朦朧。止一漁人扁舟往來獨釣江上。將艤舟假寐。渚間忽彷彿遙見二人。隱隱立于波中。迺遲相近。漁者覆蓬竊視。其人私相謂曰。北岸一人喚渡已久。我候于此。汝往與偕來。其一人荅云。此人是老儒。念經不絕。未可近之。良久。其人又謂之曰。可矣。汝亟去取之。恐踰此會。又是三年。未可間也。又荅云。彼尚念經未止。空中肅衛轉嚴。不可嚮邇。如是數次。老儒呼渡未已。迨夜分後。水中之人寂然不見。漁者知為鬼矣。遂偃卧舟中。時聽傳更已至四鼓。俟達旦微明。漁人移舟次于邑岸。邀之待涉者。獨坐水濱。漁人遽載以渡。至中流。語之曰。嚮者秀才呼渡之時。不知所念何經。二鬼俟間。欲取秀才。終夕立于波間。不敢親近。何也。老儒曰。持誦玉皇寶誥。雖暮夜獨行山林間。寂無恐懼。自是持誦益虔。

唐左監門校尉馮翊李山龍。以武德中暴亡。而心上不冷如掌許。家未忍

殞歟。至七日而甦。自說云。當死時。被冥司收錄。至一官曹。廳事甚宏壯。廣大庭內有囚數千人。或枷鎖。或杻械。皆北面立。滿庭中。吏將山龍至廳下。天官坐高牀。侍衛如王者。山龍問吏。此何官。吏曰。是王也。山龍前至階下。王問汝生平作何福業。山龍對曰。鄉人每設齋講。恒施物同之。主曰。汝身作何善業。山龍曰。誦法華經兩卷。王曰。大善。可升階。既升。廳上東北間有一高座。如講座者。王指座謂山龍曰。可升此座誦經。山龍奉命至側。王即起立曰。請法師升座。山龍升座訖。王乃向之而坐。山龍開經曰。妙法蓮華經序品第一。王曰。請法師止。山龍即止下座。復立階下。顧庭內向囚已盡。無一人在者。王謂山龍曰。君誦經之福。非唯自利。乃令庭內衆囚皆已聞經獲免。豈不善哉。今放君還去。山龍拜辭。行數十步。王復呼還。謂吏曰。可將此人。歷觀諸獄。吏即將山龍東行百餘步。見一鐵城甚廣大。上屋覆其城。城傍多有小窓。或大如小盆。或如盂碗。見諸男女從地飛入窓中。即不復出。山龍恠問吏曰。此是大地獄中。多有分隔。罪業各異。此諸人者。各隨本業赴獄受罪耳。山龍聞之悲懼。稱南無佛。請吏求出。至院門。見一大鑊。

罪人入湯受苦。楚聞山龍念佛號。一時並得息。山龍又稱南無佛。吏謂山龍曰。官府數移改。今王放君去。可白王請抄。若不爾。恐他官不知。復追錄君。山龍即詣王請抄。王命紙書一行。字付吏曰。為取五道等署吏受命。將山龍更歷兩曹。各廳事侍衛亦如此。王之遣吏皆取其官署各書一行。訖付山龍。龍持出至門。吏送歸家。見親眷正哭。經營殯具。山龍入至屍傍。即蘇。

晉李清者。吳興於潛人也。仕為桓溫大司馬府參軍督護。於府得病還家而死。經久蘇活。說云。初見傳教持信幡。喚之云。公欲相見。清謂是溫召。即起束帶而去。出門見一竹輿。便令入中。二人推之。疾速如馳。至一朱門。見故人阮敬。時敬死已三十年矣。敬問清曰。卿來矣。知我家何如。清具以敬之家事告之。敬又言。僧達道人。是汝師也。當以苦告之。可得免難。遂令一卒引清至一大寺。見一沙門在像前禮拜。卒謂清曰。此即僧達也。清求哀救度。僧達語曰。汝是我前七生時弟子。已經七世受福。迷看世樂。忘失本業。背正就邪。不免當報。今若能改悔。我當明日。百女歸。今夜止於門外。

俟我清遂於門外俟之。至曉門開。僧達果出。清便隨逐稽顙。僧達云。汝當
革心為善。歸命佛法。歸命比丘僧。受此三歸。更能持誦諸品經典。可得不
橫死。受持勤者。亦不經苦難。清便發心奉受。僧達即與授記。謂清曰。爾向
東南日光出處。即達家矣。清既還。復見向來所經歷朱門阮敬。復來相迎。
執手與語。託以家事。敬乃以一青竹枝。令閉眼騎之。清如其語。忽然到家。
入至尸前。於是而活。蓋阮敬家與清居止相近。其家已落窳。無可依託者。
清乃賙卹其子孫。分宅居之。自是歸心三寶。勤誦諸品佛典。昕夕不輟。
周阮基者。河內人也。以武帝建德七年。因射熊入王屋山東北。見一道士
坐樹下。神狀奇異。基遂捨弓矢。稽首起居已。師命基曰。可暫往觀中眺望。
巖間忽有一童子。引基到觀門臺殿嚴麗。皆飾以金玉。土地清淨。皆紺珞
琉璃。行樹端列綠葉朱實。清風時起。鏘然有聲。基於門下觀覽。心神惶怖。再
拜請退。即至師所。師笑曰。汝不敢進也。基曰。凡夫肉身。不識大道。忽於今
日。得覩天堂。情誠喜悅。不能自勝。願師弘慈。濟基沉溺。師曰。汝積罪人也。
先身微緣。今得遇我。汝命將盡。其奈之何。基聞。不勝惶悚。叩頭千百。求乞。

主道師令基捨惡從善。誓棄弓矢。乃授基智慧上品十戒。及諸品經典。令基誦之。兼爲設蔬食。食訖。令去。基再拜奉辭。師曰。汝命絕之時。吾將度汝。後基奉持淨戒。精勤經典。一日暴病而卒。唯左手一拍尚暖。家人不即葬之。三日而活。久乃能言。云。初見皂衣使者二人。執文書引基去。忽至一處。狀如臺府。至屏門。使者引入。見大廳上有官人隱隱階前。小吏數十人。皆執簿書。或青或黑。有一吏執黑簿。謂基曰。汝積罪深厚。應入地獄。基聞。倉卒惶怖。莫知何言。良久思之。忽憶聖師心中作念。於昔初別之時。聖師垂諭。必來見度。今日危困。幸垂救濟。頃臾。天西北瑞雲忽起。雲車冉冉自空而下。直至階前。去地丈餘而止。乃見聖師在車中坐。真官見之。皆稽首作禮。聖師曰。我有弟子在此。故來度之。乃取經一卷付基。基再拜跪受。顯云。太上救苦真經。令基讀之一遍。真官皆稽首受命。聽訖。謂基曰。可去。勿住此。深勤精進。後更與汝相見。言訖。失師所在。唯覺香氣氤氳。久之。乃見一皂衣使者。引基至家。唯聞家人號哭之聲。基乃還活。凝坐良久。追憶夢中經。不遺一字。乃慎持念。遂抄錄傳于世。復離親友。入玉屋山。莫知所在。

昔薛巖為忠州司馬長齋日念金剛經二十遍及諸品經年七十二臨終時見有幢蓋音樂來迎其妻崔氏即御史來儼之姑也屬纊次見巖隨幢蓋冉冉而去一家皆有異香

大明仁孝皇后勸善書卷之九

嘉言

傷讀書不破費。讀書萬倍利。○觀書一卷。則有一卷之益。觀書一目。則有一日之益。○有田不耕。倉廩虛。有書不教。子孫愚。○不登高山。不知天之高也。不臨深谿。不知地之厚也。不聞先王之遺言。不知學問之大也。

釋能於釋迦牟尼佛法中。受持讀誦。為他人說。所得福德無量無邊。○演暢實相義。開闡一乘法。廣導諸衆生。令速成菩提。○說是經故。得無量福。漸具功德。疾成佛道。○廣演言教。無數方便。引導衆生。令離諸著。○讀是經者。常無憂惱。又無病痛。顏色鮮白。不生貧窮卑賤醜陋。

道燒香行禮。晨夕誦經。棄諸雜想。心注太真。尅得玄降。白日飛騰。○長齋誦靈章。五靈互相扶。功成天地基。世世慶有餘。○若復讀誦。依經脩行。晝夜不懈。是人所在。自得安樂。隨所往生。○為諸天人。演此妙寶。得悟之者。俾躋仙阼。○若有男女。受持讀誦。我當與十戒仙官。隨所擁護。

感應

元至正辛丑陝西有民家小兒甫三歲一日村巷中遇縣官喝道來衝前呼其名作揖曰相別頗久尚無恙縣官驚訝曰此小兒焉知我名乃進而問之小兒為言前生姓名又連舉舊與酬唱詩數首縣官始信其為故人也復與縣官言曰自與君別來已歷三生矣今得再相見於此萬幸也縣官因問曰汝前身喜潛心玩易尚能記憶否小兒笑曰真是曾用此工夫不虛費也言已別去縣官因言此人受用太極未動以前一著故能出生入死不受生死移換

唐董雄河東人貞觀中為大理丞幼奉佛法蔬食多年因罪累與同列李敬玄王欣俱被維繫雄專念法華普門品滿三千遍以求脫免鏁忽夜解落雄驚告忻玄共視鎖堅全在地而鈎束相離數尺即告守者御史張守一宿直命吏燭之而甚恠重鏁封札而去雄但誦經不輟至五更又解落有聲雄復告忻玄等明日守一視之封題如故而鏁自相離敬玄素不信佛法其妻讀經常謂曰何為鬼神所媚而讀此書耶及見雄此事乃深悟不信之處方知佛大聖也時忻亦誦八菩薩名滿三萬遍鎖亦解落視之

如雄無異不久俱免

北齊後主隆化元年。法師曇遷研精華嚴十地維摩楞伽地持起信等咸究其蹟。嘗講唯識論。遂感心熱病。專憑三寶。夜夢月隨其懷。乃摩而食之。脆如冰片。既寤。所苦頓除。以食月成德。遂私名月德。後授人戒。常去於我月德前三說。受菩薩戒。

唐釋遺俗者。不測所遊止。醴泉山專誦法華為業。乃至數千遍。貞觀中。因病將終。告友人慧廓禪師曰。比雖誦經。意望有驗。吾死之後。當以十年為限。試發視之。若舌朽滅。知誦無功。若舌如初。為起一塔。庶生俗信。言訖而終。至十一年。依言發之。身肉都盡。唯舌不朽。一縣士女咸共讚歎。乃函盛舌本。起塔於甘谷岸上。

五代金州進士唐伯虎。一日病卒。心獨溫。後數日還魂。初若夢為人。追呼入官府。見主者曰。誤矣。當還已。而語伯虎曰。到人間。為我以法華經為報。亦當勸人誦之。伯虎請曰。其他日亦得祿乎。謂之曰。雖有薄爾。遂出。至家而甦。後任梧州推官。六十餘卒。

晉有釋曇邃未詳何許人。少出家。止河陰白馬寺。蔬食布衣。誦法華經。又達經旨。亦為人解說。常於夜中忽聞扣戶云。欲請法師九旬說法。邃不許。固請乃赴之。而猶是眠中。比覺。已身已在白馬塢神祠中。并一弟子。自爾日日密往。餘無知者。後寺僧經祠前過。見兩高座。邃在北。弟子在南。如有講說聲。又聞有奇香之氣。於是道俗共傳神異。至夏講竟。神施白馬一匹。口羊五頭。絹九十匹。咒願畢。於是遂絕。

宋釋慧慶。廣陵人。出家止廬山寺。學通經律。清潔有戒行。誦法華經。每夜吟誦。常聞空中有彈指讚歎之聲。曾於大江遇風濤。船將覆沒。慶唯誦經不輟。覺船在浪中。如有人牽之。倏忽至岸。於是篤勵彌復精勤矣。

唐貞觀中有王順山。悟真寺僧。公幹夜於藍溪。忽聞有讀法華經者。其聲纖遠。時星月迴臨。四望數十里。闐然無覩。其僧慘然有懼。及至寺。具白其事於羣僧。明夕俱於藍溪聽之。果聞經聲自地中發。於是以物表其所。明日窮表下。得一顱骨在積壤中。其骨槁然。獨唇吻與舌鮮而且潤。遂持歸寺。乃以石函致於千佛殿西軒下。自是每夕常有讀法華經聲在石函中。

長安中有士女觀者千數。後新羅僧客於寺。僅歲餘。一日寺僧盡下山。獨新羅僧在。遂竊石函而去。寺僧跡其往。已歸海東矣。時開元末也。

宋李元佐以紹興十六年監建州豐國監。生女子。買民妻陳氏為乳母。女既長。因不復肯言歸。媼賦性獷戾。常與人競。視同列無如也。乾道四年。女嫁王氏。以其好罵弗與之俱。後三年。李為戶部郎。陳死於臨安。赴歛僧舍。旋命僕泄火化。將以其骨歸。明日僕往收燼。未出。聞喧呼。覲衆視之。則有老幼數十人聚立火所。曰。火尸香如蓮花。聞於外。是異人也。故來觀之。僕為留一宿。黎明呼僧誦經。未集。遠近已奔湊。視灰中皆舍利。衆競取之。僕切於拾骸。不暇尋覓。只得十餘顆以歸。色如泥金。而光明可鑑。其形若小兒。高不盈寸。李始歎異。訪諸姨云。此媼平生險惡。有何功力致然。皆云無他善業。但每朝早起。即誦法華經十餘遍。不能記全文。唯止憶三兩句。每日清晨鍾靜。只聞如是而已。媼生前罵人。當積口業。而用三十六年誦經之故。獲報乃爾。亦其善念堅固所致云。

唐永徽年中。太白山有兩僧。名道祥。慧悟。祥持涅槃。悟受華嚴。忽有居士

作禮請一僧齋僧云二人不知請誰居士云請華嚴師悟乃赴請於是居士置悟於衣上坐令其瞑目只耳聞颼颼風聲少頃放他開目不知到處唯見屋宇嚴麗延悟入堂禮佛繞畢忽五百僧翔空而至悟遂下坐居士語曰此日齋意在師一人雖五百羅漢臨時請耳師持華嚴是佛境界何得於小聖下坐引悟坐於聖衆之上齋罷居士令一童子送還童子請悟開口飛入口中悟即騰身空中謂祥曰神仙請齋遂獲神通今欲暫之金闕昇空而去

唐上元中洛州敬愛寺有律僧歸覲及鄭州界迫暮投店次有僧至不知其名並房安泊其後來僧謂主人曰貧道疲餒酒酤三升肉買一斤飲噉迨盡律師怒而訶之身披法服恣噉酒肉不知慙愧其僧默而不答少頃索水漱口端身趺坐緩發梵音誦大方廣佛華嚴經入如是我聞至寂滅道場其僧口角兩邊俱發明光透射房舍泊至三更猶聞誦經聲不絕光明轉盛誦至六帙即歇收光其僧乃卧天明律師涕泣懺過輕謗聖賢

頂罪消滅

周僧延壽字冲玄。總角誦法華經。五行俱下。六旬而畢。投四明翠岩禪師出家。衣不繒纈。食無重味。復往叅韶國師。發明心要。嘗謂曰。汝與元帥有緣。他日當大作佛事。惜吾不及見耳。初往天台智者巖。九旬習定。有鳥尺鷁音晏巢於衣衾。古得切。衣角也。後於國清行法華懺。夜見神人持戟而入。師訶之曰。何得擅入。對曰。久積善業。方到此中。夜半遶像。見普賢前蓮華在手。遂上智者巖。作二闡。一曰。一生禪定。二曰。誦經萬善。莊嚴淨土。乃冥心精禱。得誦經萬善闡。乃至七度。於是一意專脩淨業。振錫金華天柱峯。誦經三載。禪觀中。見觀音以甘露灌其口。遂獲辯才。初演法於雪竇。詩建隆元年。忠懿王請住靈隱。二年遷永明。日課一百八事。未嘗暫廢。學者參問。指心為宗。以悟為則。日暮往別峯行道念佛。旁人聞螺貝天樂之聲。忠懿王歎曰。自古求西方者。未有如此之專功也。乃為立西方香嚴殿。以成其志。居永明十五年。弟子一千七百人。常與眾受菩薩戒。夜施鬼神食。晝放生命。皆悉回向莊嚴淨土。時人號為慈氏下生。開寶八年二月二十六日晨起。焚香告眾。跏趺而化。

昔佛告四衆。吾於過去無量劫中。求法華經。無有懈倦。於多劫中。常作國王。發願求於無上菩提。心不退轉。為於法故。捐捨國位。委政太子。擊鼓宣令。四方求法。誰能為我說大乘者。吾當終身供給。走使時有阿私仙人來。白王言。我有大乘名妙法華經。若不違我。當為宣說。王聞仙言。歡喜踊躍。即隨仙人。供給所須。採果汲水。拾薪設食。乃至以身而為床座。身心無倦。于時奉事經於千載。為於法故。精勤給侍。令無所乏。爾時王者。釋迦文是。時仙人者。今提婆達多是。由提婆達多善知識故。令我具足六波羅密。成等正覺。廣度衆生。

昔過去日月淨明德佛。為一切衆生。喜見菩薩。及菩薩聲聞衆。說法華經。是菩薩樂集苦行。一心求佛。滿萬二千歲。已得現一切色身三昧。得此三昧已。即作念言。我得是三昧。皆是得聞法華經力。我今當供養於佛及法華經。我雖以神力供養。不如以身供養。即於佛前。自然其身光明。徧照八十億恒河沙世界。其中諸佛。同時讚言。善哉善哉。是真精進。是真法供

養如來。

昔有四比丘。於法華經。極生殷重。悉舒祕教。甘露未霑。由是結契山林。其期佛慧。幽居日積。衣糧單盡。萬里雲霄之志。可得言哉。其一人云。吾等四窮。尚不存身。法當安寄。汝三人宜以命奉道。我一人者。當給所須。自爾振錫門間。以求供給。雖寒暑代謝。甘喜無愠。以故三人功圓事辦。一世之益。當無量生。其一人者。數涉人間。屢逢聲色。坏器未火。難可護持。偶見王者。出入車駕。喧闐。生心動念。愛彼光榮。功德熏脩。隨念受報。人間天上。常得為王。福雖不貳。亦有限也。三人既得道果。會而議曰。我免樊籠。功由此人。彼耽果報。增長有為。從此死已。當沉火坑。幸其未墜。正宜設化。一人云。此王着欲。而復邪見。若非愛鉤。無由可拔。一人可作端正婦。二作聰明兒。兒婦之言。必當從順。如宜設化。果獲改邪。時國王者。即妙莊嚴王。今華德菩薩。是其婦。即淨德夫人。今光照莊嚴相菩薩。是而昔二子。即淨藏淨眼。今藥王藥上二菩薩。是。

宋江陰齊三妻歐氏。產乳多艱。幾死乃得免。一子宜哥。年六歲。警悟解事。不忍母困苦。咨於老人。問何術可脫此厄。老人云。唯道家九天生神章。釋

教佛頂心陀羅尼為上。即求二經。後一史道者學。持誦三日。悉能暗憶。於是每以清旦各誦十遍。焚香仰天。輸寫誠懇。凡越兩歲。紹熙元年。歐有孕。更無疾惱。至十月。將就蓐。宜哥焚誦之次。見神人十輩。立侍于旁。異光照室。少焉分甦。母子俱安。

昔天竺國有一阿蘭若。

華言閑靜處

比丘名摩訶羅。讀摩訶衍。

華言大乘德行彌著。

國王正信。嘗布髮掩泥。令比丘蹈。又有比丘來白王言。此人不多讀經。何大供養。王言我曾一日夜半。欲見此比丘。即到其所。見彼在一窟中。讀法華經。有一金色光明人。乘白象王。合掌供養。我方親近。彼即滅沒。我問大德。以我來故。金色光明人滅耶。比丘言。此是徧吉菩薩。徧吉自言。若有人誦法華經。我當乘白象來教導之。我讀是經。徧吉自來矣。徧吉即法華經中普賢菩薩也。我聞是已。禮足而退。是故我今常當供養。

姚秦法師鳩摩羅什。

華言童壽。此法師名也。

龜茲國人。七歲出家。日誦千偈。其母嘗

携至月支國。見一羅漢曰。此沙彌至三十五。若不破戒。當大弘佛教。度無數人。戒若不舍。止才明法師而已。母唯其言。一日謂曰。大闡東土。唯爾之

力。但於爾自身無益耳。什曰。大士之道。利彼亡軀。若使大法流傳。能洗蒙俗。雖身當鑪鎔。無恨矣。時苻堅據關中。太史奏云。有德星現外國分野。當有大智人入輔中國。堅曰。朕聞西域有羅什。將非是耶。即遣呂光率兵伐龜茲。光既獲什。迴至涼州。聞苻堅為姚萇所害。乃據關外。僭號後涼。萇卒。子興龍位。廟庭俄生連理樹。逍遙園蕊變為菰。以為祥瑞。遂伐呂光。迎什入長安。待以國師之禮。興於逍遙園。引諸沙門。聽什講說。什辯通華夏。覽舊經與胡本乖謬。以弘始八年於草堂寺。與僧詵等八百餘人對舊經。考校譯此妙法蓮華經一部七卷。後忽感疾。即語衆云。因法相遇。殊未盡心。無何緣謝。所譯法華等經。幸共流布。若所譯無謬。願焚軀後。舌不焦爛。言訖而終。至於闍維。舌果不灰。

晉釋道生。從師姓竺。年在志學。吐納清新。人皆畏服之。常以入道之要。慧解為本。故讚仰羣經。不憚勞苦。遂往關中。稟承羅什。辯問超卓。咸稱神悟。後遁蹟虎丘寺。有講臺石。至今存焉。或時居半塘。誦法華經。忽有一雉。常來聽受。一日不見。師念之。夜入夢云。某因聽經。遂獲改報。今在某家為兒。

子待過數年。却來奉事。洎師詢之。果爾。及出家。無何童子命終。因瘞于林。一夕放光輝。照塘塢。鄉人異之。啓看。乃獲一舌。生青蓮華。因是起塔。後葺成寺。即半塘寺是也。

隋僧法俊。住碧澗寺。行法華三昧。即獲悟入。示滅之日。仙樂盈空。天香亘野。衆見凌空西向而去。

隋僧等觀。生于富陽孫氏。為僧已後。聞智者開法佛隴。遂往依承。專誦法華。無能講說。貞觀中。赴餘杭法忍寺講。忽一夜見神人曰。吾錢唐皋亭祠神也。師嘗經過廟庭。弟子巡遊不值。今故特來求授戒法。師即為然香秉宣。至明日夜半。奄然命終。

晉僧法莊。淮南人。十歲出家。為廬山遠公弟子。性率直。以苦行有名。誦法華經。自為恒業。常於靜夜。隣者每聞師房前有兵仗羽衛之聲。

隋僧法京。姓朱。會稽人。年少聚沙為塔。蒿艾為殿。合掌稱佛。忽遇乞食僧。勸之曰。汝可往天台山出家。彼有初依菩薩說法化世。兒即奔往。便侍智者。為弟子。智者笑曰。宿願力故。今得相遇。於是曉夕左右服膺。無懈。師因

教誦法華經一部無懈懈法。後隨侍智者入廬山。即於陶侃瑞像閣內。要制法華三昧。俄見一僧云。汝法名未勝。應改名為普明。則照了三世矣。自是後改為號。晚旋歸國清。所居之房乏水。師想念石上忽流泉。又嘗鑿石文六廬舍那像。感異人施金而隱。一時於赤城松林中。現身高數十丈。章安頂禪師親見之。

陳僧慧思。武津李氏子。幼立志持戒。日唯一食。不受別供。十年專誦法華。七載常行方等。九旬常坐脩一行三昧。續詣北齊慧文禪師。所諮稟禪法。長夏攝心。夏滿受歲。慨無所證。放身倚壁。背未至間。豁然開悟法華三昧。及餘大小法門。後止光州大蘇山。道俗福施。造金字般若金字法華。衆請講二經。即與敷叙。莫非幽蹟。次至南嶽。見林泉竦淨。乃曰。此古寺基也。依言掘之。果獲殿址器皿。又往巖下。乃曰。吾先世在此坐禪。為賊斬首。由此命終。又今世也。衆共尋覓。乃得枯髑。師得而頂戴。因起塔以報昔恩。陳宣帝詔住棲玄寺。道俗顙仰。忽有普賢摩頂。涌生肉髻。常往瓦棺。遇雨不濕。履泥不汙。或現身大小。或寂爾藏身。瓶水常滿。若有天童給侍。臨終日。大

集門學說法。唱言衆聖相近。泯然命終。感異香滿室。遠近咸聞。時太建元年也。

陳僧智顗。裔出潁川。世居荊州華容縣。十八出家。湘州果願寺。二十剃髮受具。即往大賢山誦法華經。無量壽普賢觀。歷於二旬。三部終畢。後住瓦棺寺。首開法華玄義。隱居天台。初宴息於銀地。時經行於東南峯。或居方丈。誦法華經。而入三昧。衆魔惡鬼。競來惱害。師於禪定中。亦不覺神之變。恠。一時講誦法華。感普賢乘白象。躡駕於前。隋煬帝居藩。請為菩薩戒師。乃賜智者之號。後歸老天台。一夜忽夢大風吹壞寶塔。是時詔書連徵。至石城像前。遽云有疾。遂命弟子唱法華經。而自讚曰。法門父母。慧解由生。本迹曠大。微妙難測。輟斤絕絃於今日矣。

隋僧慧超。生丹陽沈氏。性溫裕。自幼從釋。專課法華。聞光州思大禪師。定慧雙明。毗尼華言律無善。乃與智者虛心潔已。摳衣請業。思曰。超之神府得忍人也。及遊衡嶺。復與智者同塗誦經。移歲後。隱終南。八載行道。倍隆三

慧聞思。大唐伊始。榮重京師。師自入道。即誦蓮經。五十餘年。萬有餘遍。泊

寢疾將終。召衆告曰。往返吾之常也。長生不忻。夕死不感。第一義空清淨智觀。是吾凭仗。言已。向西而逝。遺言令露屍松石。以施禽獸。弟子依教。停一月餘。顏色如生。還累塔以窆之。

隋僧智瑛。姓張氏。清沂人。年十七。亡二親。染患至篤。知無生意。夜忽見月。遂念月光菩薩。因而得差。深知三寶。是我依憑。即往安淨寺出家。挺志高邁。言行俱實。逖聞智者悟解超羣。遂抵台嶺。服膺受道。智者察其根器。乃遣行法華三昧。洎脩至二七。初夜坐禪。乃見一九頭龍從地涌出。上升虛空。瑛明日白師。師曰。此表九道衆生聞法華經。將來之世。破無明入法性空耳。又嘗於寶林寺脩法華三昧。啓脩初夜。如有人來搖動戶扇。瑛師問之。荅曰。我來看燈耳。頻經數過。荅問如前。寺有慧成禪師。聞其事而言曰。彼堂內從來有大惡鬼。今聞此聲。是必相害也。天曉扣戶問之。見其猶在。甚喜。成因以報永陽王。王即遣數十兵吏執杖防護。瑛曰。命由業也。豈在防護謝而去之。至第二夜。鬼即入來。徧打東西。於三七日恒爾為惱。瑛坦然無懼。行法將訖。見一青衣童子稱讚善哉。言已不見。

隋僧大志。會稽顧氏子。發蒙出家。師事天台智者。智者見其形神灑落。高放物表。取名大志。誦法華經。索然閑靜。音聲清轉。聽者忘疲。後於廬山甘露峯行頭陀。華言行。有時投身猛獸。彼皆避去。食粒若盡。唯以餅果繼命而已。如是七載。禪誦不休。晚住持福林寺。會大業中。屏除佛教。慨大法陵遲。遂身著孝衣。於佛堂中慟哭。三晝夜。誓捨形骸。申明正教。即往東都。上表曰。願陛下興隆三寶。貧道當燃一臂於嵩嶽。用報國恩。帝許之。遂設大齋。士衆通集。師絕糧三日。登大棚中。布裹其臂。灌之以蠟。如炬然之。光照巖岫。晃然大明。衆見苦行。痛入心髓。而志形色不變。或誦經文。或讚佛德。或為衆說法。聲聲不絕。燒已下棚。跏趺入定。七日而卒。

隋僧道悅。俗張姓。荊州人也。十二出家。玉泉寺。器識沉邃。安貧苦節。長誦法華。以為德業。玉泉智者創置。未有鐘磬。師於泉源得恠石一片。懸之。每誦經一卷。輒扣一下。聲韻清徹。聞者肅然。幽冥之徒。屢有祥感知。而不傳。嘗患水腹。急如鼓。一夜誦經。水忽流注。洪腫頓消。

晉僧靜生。蜀郡郫人。俗袁氏。少為僧。以苦行聞。成都守宋豐請主三賢寺。

誦法華經。又習禪定。嘗於山中誦經。忽有一虎來蹲於前。徹章乃去。後誦習次。常見四神人左右侍衛。年雖垂老。行業弥堅。洎感疾。即付囑門人。跏趺而坐而化。

晉高昌僧法緒。德行嚴峻。飯蔬飲水。後入蜀居劉師冢間。行頭陀行。虎兇見而不傷。常處石室。誦法華維摩華言淨名光明三經。忽於一夏。在石室中。右脇命終。七日不壞。香氣襲人。每夕放光。照徹數里。鄉人異之。即於屍上為起冢塔。

晉僧法義。俗姓竺。十三歲入道。專勤梵行。誦正法華經。住瓦棺寺。後遷會稽寶山精舍。咸和二年。染疾。誦習無虧。夜夢一僧為出腹。胃洗滌垢穢。洗已還納腹中。夢覺。疾即痊愈。晉帝嘗宣至禁中。後受五戒。供奉殷厚。至太和年。不疾而化。勅市新亭崗起塔安窆。

晉僧竺法曠。俗阜氏。寓居吳興。志操高卓。戒行淵深。本師寢疾。曠為祈誠禮懺。凡七晝夜。因感五色光明照室。其病即差。後止於潛青山石室。每言法華為會三之旨。無量壽為淨土之因。常吟詠二部。有衆則講。平居則誦。

謝安為吳興守時往展敬。晉簡文帝召至。命齋懺以遣妖星。晚遷禹穴。昌原寺。為百姓拯救危苦。莫不效驗。有人常見師行坐間。每有鬼神數十輩衛於前後。享年七十六。

晉建興二年。長沙縣西一百餘里有青蓮花。兩本生於陸地。道俗爭觀。因掘其地一丈二尺。得一瓦棺。而蓮出於棺之壞處。斲棺視之。有髑髏拴索。其蓮根生於齒頰間。時有說者曰。昔有僧不知名氏。誦蓮經十萬部。不疾而化。遺言使裹紙服以瓦為棺。此其是矣。

魏范陽五侯寺僧失其名。誦法華經為常業。初死。權殮隄下。後改葬。骸骨並朽。唯舌不壞。又雍州有僧。亦誦法華。隱白鹿山。感一童子供給。及終。置屍巖下。餘骸並朽。其舌如故。

宋僧慧紹。不知出處。孩孺時。母哺魚肉。即吐。自是不茹葷。八歲出家為僧。通法華經。苦行堅節。後隨師僧要。止臨川招提寺。常念佛恩之重。誓欲捨身以報。乃顧人所薪於東山石室。積高一丈。中開一合龍。即還寺告師。師諫。不從。於是剋日就山。建八關齋會。闔境雲奔。盈滿山谷。至夜。紹自行香。執

燿然薪火龕而坐。誦藥王捨身品。火訖至。額猶聞經聲。大眾忽見一星大如斗。直下火中。俄而升天。咸謂天宮迎接之瑞。紹嘗謂同學曰。吾燒身處。當生梧桐木。切莫伐之。後三日果爾而生。道俗異之。時元嘉廿八年也。

宋僧瑜。俗姓周。吳興人也。弱冠出家。行業純備。於廬山南建招提寺以居之。常持蓮經。未嘗少替。一日謂友人曰。結累三塗。情形故也。情將盡矣。形亦宜捐。藥王之轍。獨何遠哉。遂積柴為龕。設齋辭衆。是日雲雨交零。乃發誓曰。若我捨身無悔。天當晴朗。不然。即霧霤矣。言已。雨霽。至夜入龕。合掌趺坐。誦藥王本事品。火燄至體。其坐自若。衆見紫氣騰空。經日不散。時年四十四。過後十四日。瑜之舊房。忽生雙桐樹。枝葉豐茂。貫壤直聳。識者以爲娑羅雙樹。克炳泥洹之道。瑜之庶幾。故見斯瑞。因號雙桐沙門。

宋僧慧益。廣陵人。出家壽春。後憩竹林寺。氣節卓越。精誦法華。誓願焚身作真法供。凡在見聞。毀讚尤多。初絕粒。食酥油。後斷酥油。服香丸。雖四大綿薄。而精神警正。孝武深加敬異。遣使諫止。不從。以大明七年佛生日。於鐘山南置鑊辦油。乃詣闕辭帝。帝見改容。師再三囑以佛法而退。帝親駕

見臨時四衆奔集。師乃入鑊。纏以吉貝。灌之以油。將欲發火。帝復止之。益確固不從。且曰。微軀賤命。何足介聖意。願乞度二十人出家。為佛法助。勅許之。益執燭自然。合掌誦藥王品。火至眉睫。猶聞其聲。衆見悲慟。響震山谷。帝忽聞空中笳管之聲。異香芬馥。盡日方還。是夜帝又夢。益振錫而至。復囑以佛法。翌日帝設大會。度二十人。勅於燒所建藥王寺云。

晉僧登師者。止住廬大林寺。通誦法華。晝夜不息。一日忽見空中有一銀殿。漸下於房。忽變成金殿。師遂入殿。坐起經行。如是三載。安王聞之。累詔奉迎。因暫下山。王與四衆嚴持香華。從師乞戒。登曰。白日喧雜。心多散亂。當於清夜受之。至夜正說戒相。三歸依時。師之口吻放光明。徧照大衆。衆見光明。競拜喧闐。師即不語。光便收斂。師云。本欲受戒。那得見光。喧闐光現。但是受戒祥瑞。未是得戒正緣。今更從初。大衆默然。師又說法。還復放光。衆又喧闐。因而且止。明日再來。師即辭別。歸山。所現金殿還復如故。一日忽謂門人曰。今登金殿。不復迴也。即於是日倏然超化。

晉僧法志。結菴餘杭山。誦法華經。朝夕不懈。有雉巢于菴之側。每聞誦經。

聲則翔集於座傍。若侍立聽受狀。如是者七年。一日憔悴。師撫之曰。汝雖羽族。而能聽經。苟脫業軀。必生人道。明日遽殞。師即瘞之。及夜方假寐。夢童子再拜曰。我即雉也。因聽師誦經。得脫羽類。今生於山前。王氏家為男子。右腋猶有雉毳。見可驗也。僧詰朝至其家問之。果然。王氏一日設齋。志方踵門。此子遽然曰。我和尚來也。舉衆異之。携以示志。志撫之曰。此我雉兒耳。遂解衣周視。其腋下果有雉毳。志曰。至七歲宜聽出家。父母唯之。至時入山。十六落髮。以腋有毳。命玄曇翼授與蓮經。不遺一字。志師歸寂。翼即為此山第二祖矣。

宋僧弘明。生於會稽羸氏。出家雲門寺。節行孤高。人所具瞻。誦法華經。坐禪禮懺。六時不輟。感淨瓶之水常滿。人謂天諸童子給侍也。一日坐禪。忽有一虎蹲伏于前。久之乃去。續往永興石姥巖入定。亦有山精來惱。明以腰繩繫之。精遜謝求脫。即曰。後不敢來。自爾絕跡。

齊僧慧豫。黃龍人。少務學。游京師。止靈相寺。徧參名師。或聞臧否人物。輒塞耳不聽。誦法華大涅槃等經。一日寢卧。忽夢三人扣戶。衣冠鮮潔。執蓋

相迎問之。答曰。法師應死。故來奉迎。豫曰。小緣未了。可延一年否。遂諾而去。至明年是日。復夢三人如初。因爾而卒。

宋僧了宣。西明寶林肄業。入南湖光嚴堂。閱大藏。預法華期懺二十七年。與榮行人最相善。一日詣榮室。默坐。榮問之。師曰。西歸有期。難忘道義。冀公淨土重會耳。榮喜曰。正所幸願。忽示疾。請衆諷彌陀經。念佛之際。端坐書偈曰。性相忘情。一三無寄。息風不行。摩訶悉利。合掌而化。炎暑停龕七日。顏色紅潤。異香噴人。士庶聞之。傾城來哀。闔維之處。舍利無筭。

周釋慧命法師。長沙人。十五誦法華。纔七日終一部。與法音為淨土友。一夕携手月下。相顧笑曰。時至不行為貪生。西方有期。吾其去矣。音曰。寧不俟我十日。命豎兩指曰。過此不可也。越二日果終。衆見天人下降。奇香異樂。咸唱善哉。後十日音亦亡。祥瑞悉與命同。

晉僧跋澄。年二十出家為僧。根器魯鈍。罔然無所措。立志誓誦蓮經。以求西邁。日記一行。或得半偈。如是勤苦。至八十歲。方通一部。一日忽見朱衣神人。手持請疏曰。天帝奉迎。大德跋澄。師曰。生來愚鈍。隨分誦持。專祈極

樂忉利。雖是勝處。非所願也。神人辭去。又一時夢七寶大塔。身居第五層。望見七寶城階。無有涯際。外有二金剛執杵而立。數十青衣手執白拂。以拂階道。澄問。答曰。此是西方寶城階道。來迎跋澄。夢覺。即語弟子曰。汝將吾衣鉢。營大衆齋。又言。汝等此時見千佛否。答云。不見。又曰。覺非常香氣否。答云。咸聞。言已。面向奄然而化。

梁僧法雲。陽羨人。俗周氏。其母始生。見雲氣滿室。因以雲為小字。七歲出家。立名法雲。年三十。講法華淨名。機辯風生。嘗於一寺。講敷此經。忽感天華。狀如飛雪。滿空而下。延于堂內。不空不墜。講訖乃去。時誌公道超方外。或來雲所。曰。吾欲解獅子吼。請師為說。師即陞猊。剖析誌。彈指曰。善哉。微妙矣。武帝一日。以天亢陽。問誌曰。何計得雨。誌曰。雲能致雨。當請雲師講經。雲講法華。未畢。即大霈膏澤。

梁時僧遷。出於嚴氏。自幼神俊。識者奇之。師侍法師道則。自弱冠便誦蓮經。數溢六千。一日坐而若寐。夢見普賢垂光照燭。親為摩頂。書而不傳。至將示寐。方陳同志。法華大品涅槃等十八部經。各講數十遍。皆制義疏。流

傳後學。後歸寂。窆于江陵中華山。

隋僧法崇。薦志經論。尤精法華。嘗至湘州麓山。山精化為夫人。詣崇請戒。因捨所居山為寺。未幾化洽湘土。

隋僧玄秀。居黃州隨華寺。性清志溫。常誦法華。每有異相。不以為奇。時當酷暑。師方誦經。友人遣价召師納涼。行至房前。忽見人馬翊衛。怖懼而返。友人親往。所見果然。迴轉後門。兵甲彌多。填塞空中。不可勝數。四衆盛傳。咸曰神異。

隋僧生。孤雲之性。初無定姿。但是伽藍。不問有無僧衆。於中止住。乞食自資。誦法華經滿一千部。即便移錫。開皇中。至靈巖寺持誦。一夜忽見神人數十。俯伏聽受。生曰。汝是何者。神曰。弟子是山神。住此已七百年。今聞法師誦經之聲。特來聽受。請師為誦。良久乃去。自是常來。師續詣相州法藏寺。建大藏於眼中。然燈供養大衆。旋誦不息。後終於彼。

隋大業中。虎丘有僧亮。十二出家。稟學唯誦法華。未滿四旬。一部通利。南游會稽。於剡縣三生象前。鄭山舍利塔前。各然一指。以表慧燈。供養。尋返。

故鄉止北禪寺。一日忽索湯盥沐。與檀越作別。正坐而化。感異香滿室。
唐古濟國沙門慧顯。少出家。有大志。唯誦法華經。或有祈福請願。無不如
意。聞講三論。便往聽受。法一染神。彌增慧解。初住本國脩德寺。有衆則講。
無則清誦。四遠聞風。咸來參侍。師厭於迎接。竭往南方達拏山。山極深險。
顯坐其中。專業如故。遂終於彼。同學昇屍置石室中。虎獸身分俱盡。唯髑
髏與舌存焉。經于三年。其舌紅赤柔輒。勝初。後變為紫色。其堅如石。道俗
仰止無窮。累塔表識。時貞觀初也。

隋僧法喜。生於襄陽李氏。七歲出家。荊州清溪寺。雖學諸經。唯以法華為
宗骨。文帝勅住禪定寺。晚年欲祈通感。誓誦蓮經千徧。因不止舊房。巡繞
塔寺。誓填本願。數滿八百。寺僧忽見一白馬。駕寶車入喜房。後歸老廬。陵
唐貞觀六年。染疾。名門人曰。無常已至。勿事囂擾。三界虛妄。但是一心。大
衆忽聞林北有音樂車震之聲。因以報喜。喜曰。世間果報已捨。如何更生
樂處。須臾異香充室。端坐而化。

唐僧會通。雍州人也。少忻道檢。剛勁高節。隱終南豹林谷。綜業讀法華經。

因見藥王捨身。便欲仰倣。私積柴木。誓欲行之。以貞觀末年。於靜夜中誦菩薩本事。以火焚燎。煙焰甚盛。卓爾跏趺。誦聲如故。衆於是時。忽見西方有太白光。流入火聚。燒已。收聚餘骸。即樹勝塔。勒石山中。以傳不朽。

隋僧慧旻。河東人也。九歲出塵。服勤白業。誦蓮華經。後主光興寺。講法華經。彈指之間。異香屢至。聽者雲集。咸言善瑞。後遷通玄寺。結會行道者。一十七年。足不踰閭。隋末崩離。吳中飢饉。四衆逃難。唯旻守死禪誦。大唐開化。止南澗寺。兩兔一彪。相親同止。未終前三日。異香滿室。舉衆問師。師曰。吾後日當去。生死人之常也。寄世若行雲。各念無常。早求自度。至期果順化。

唐桂府城外。江東五里有雉山寺。其始有一僧卓菴此地。日誦蓮華經。仍能講說。忽有一雉。常來伏翼。聽受終第五卷。雉即不來。後八年。山下民家生一男子。年始八歲。不葷不戲。堅欲投其僧出家。父母聽之。既去。一日僧浴。令兒淨背。堅不肯袒衣。僧問。答曰。某前身即雉也。因聽師講誦。故報為人。今掖下猶有雉毛。故不袒也。僧因授是經前五卷。覽司舊習。後二卷則

不能也。後出山以知名。因山置寺。寺猶存也。

隋僧智聰。住揚州白馬寺。專習三論。尋渡江。住安樂寺。值隋國亡。思歸無計。隱江荻中。誦法華經。七日不飢。恒有四虎馴。聰曰。吾已十日不食。命在呼吸間。卿可食之。虎作人言曰。造天立地。無有此理。忽見一老翁。腋下挾一小船來。曰。師欲渡江。即上船。其四虎見而淚出。聰曰。持危拔難。正在今日。即同四虎利涉南岸。船及老人。忽然不見。聰領四虎止西霞塔西。經行禪誦。誓不寢卧。安衆八十餘人。若有凶事。虎來大吼。由此警覺。至貞觀中年九十九。於佛降生日。熏鑪徧禮聖像。還歸于靜室。端坐而化。

唐僧法嚮。揚州人。身長八尺。骨狀魁岸。十六出家。即事勤苦。通誦法華。以為德業。晚於西霞寺側。立法華堂。行智者法華三昧。三七精進。大獲靈瑞。知而不言。一時有虎侵害人民。日計數十。道俗設禳災大齋。虎忽入堂。搏一人去。師隨後喚住曰。何故造次。今為設齋。可放此人。虎即放之。自後諸虎皆集。師以杖扣頭為說正法。自此不復為害。

唐僧儀禪。師止蘇州開元寺。造大佛殿。忽見一婦人抱兒子告師曰。兒子

為患請轉法華經一部。禪師轉畢。還有一朱衣佩劍來者。拜曰。前日妻子為兒所患。蒙師轉經。今已得愈。特來相謝。聞師造殿。謹以錢十千相助。弟子是許將軍。師曰。公住何處。許曰。住師屋後。言訖不見。師遣人穿地尋之。乃見骸骨一具。佩劍橫身。人皆歎異。師即祀而葬之。

唐僧法轍。絳州人。少而勤苦。通法華經。常以是業誘化一切。乃於孤山西河造一堂宇。初置伽藍。處元無水。一旦地陷。清泉迸出。故秦州刺史房仁裕申請寺額。即以陷泉為名。師又善持呪。多有應驗。永徽二年二月。自知將死。囑付徒眾。端然坐逝。時天色晴朗。雨華如雪。香而不釋。樹枝草葉白同粉色。周二里餘。三日始隱。終後三年。坐身不壞。

唐釋大義。蕭山徐氏子。生而英特。十二從釋。山陰靈隱寺。凡是經教。開卷必通。開元中。喪其親。因入天台佛隴。閱大藏。報劬勞。謁見左溪。稟承止觀。超然悟心。以畢大事。平生誦法華。涅槃。大小戒本。以為行業。終時。咸聞空中有奏天樂之聲。

唐僧遂端俗張氏。授師於明之德潤寺。為人質直清粹。不安交游。師授蓮

經誦猶宿習。人皆駭歎。十二時中。口吻不輟。至老不懈。咸通二年。跏趺而絕。須臾。口生青蓮華七朵。芬芳香潔。遠近聚觀。於是造龕。窆於東山之下。經二十餘年。塔內屢見光現。及啓視之。形質如生。遂迎還寺。漆紵飾之。

唐僧元慧。晉平原內史陸機之裔。髫齡穎悟。長而溫潤。出塵納戒之後。入五臺山。觀禮聖迹。歸建興寺。立志持三白。會昌中。遭沙汰。宣宗朝。還入法派。咸通年。送佛骨。舍利往鳳翔。鍊左拇指。口誦蓮經。其指復生。所誦法華。平生不計其數。三白者。白飯。白水。白鹽也。又身不偏觸。口誦真經。意不安緣。此三明白。身此嘉名。以故。吳人呼為三白和尚。

唐僧鴻莒。即楚公之兄也。出家越之龍宮寺。精通蓮經。晝夜讀誦。每見鬼神扶衛。或為添香然燈。至後唐長興中。不疾坐亡。至于三更。手敲龕門曰。吾緣佛土善友。嫵服裝不淨。以故轉來。易畢。再坐去。至於七日。頂上猶暖。葬後。每有一虎遶塔號叫。

唐釋貞誨。姓包。吳郡人。十三出家。龍興寺。守性沉靜。分陰是競。方逾一稔。誦徹蓮經。用是為常業。日周二部。十九祝髮。自是伊洛晉郊。凡有講筵。莫

不參聽。天祐中。至京相國寺寓舍。講法華經十許徧。後會宋州師孔公。仰師高行。即給俸於西塔院。置長講法華堂。後將終。自具湯沐。更淨。令唱上生禮佛。忽望空合掌曰。勞煩衆聖。排空相迎。徒侶爾時並聞天樂之聲。頃刻而卒。

昔潭州門裏街北巷。有青衣寺。有僧亡其名。於此地誦法華經。每致靈異。世不具傳。一時感二青衣童子侍奉。死後葬之。忽於冢上生二蓮華。發而看之。乃自古根而出。因建此寺。遂以青衣為名焉。

唐中書令岑文本。江陵人。少懷正信。常誦法華普門品。偶公幹乘船過吳松江。中涓風作。人船俱沒。文本浮在水面。聞人語曰。但念佛誦經。必不死也。如是者三。自此隨波達于北岸。後於江陵設齋。雲徒並集。有一僧獨後去。謂文本曰。天下方亂。君幸不遇害。當逢太平。致富貴也。言已而去。文本忽一時食椀中。得舍利二顆。獲太平富貴。皆如僧言。

隋開皇年。臨沂有王梵行。少瞽兩目。其母慈念。口授法華經。誦計一萬七千部。其後目雖瞽。其日夕往返。織簾縫衣等事。皆無礙。人疑其別有所得。

問之終不肯說。布衣蔬食。終身不娶。年七十一而終。遺言送屍林野。任
獸啖食。肉盡骨存。舌則不壞。色如蓮華。

唐王淹。琅琊臨沂人。祖父皆顯宦。淹官至黃門侍郎。生而魯鈍。專樂大乘
法華一部。終始誦通。後病亡。有弟固。即新安太守。亦誦蓮經。忽夢兄曰。吾
生西方。在鐵葉蓮華胎內五百年。華開始得見佛。以苦志誦經。故得西方
之生。以魯鈍故。尚受胎報。告汝等知。當思來報。勤心經典。勿懈怠也。言已
而別。

隋陸淳。吳郡人。雖居俗舍。心常慕道。法華一部。日夕誦持。後忽病。一向仰
臥。開眼看屋。了不暫瞬。有知識僧來問疾。君何仰臥視屋耶。答曰。佛記陸
淳。當生夜摩天。今見彼天宮殿城闕。及諸天衆。以故我今顧盼不倦。過四
日遂終。

宋元嘉十四年。孫彥曾家世奉佛。妾王慧稱。少而信向。年大彌篤。誦法華
經。輒見浦中有新色光。使人掘深二尺。得金像連光。趺高二尺一寸。趺銘
云。建安五年歲在庚辰。官寺道人法新僧行所造。

元鐵鏡和尚住何山座下。有恭都寺者。四明人。廉介自持。精脩梵行。日誦法華一部。臨終無疾苦。更衣坐逝。闍維舌根不壞。

宋紹興二十八年。無為軍指使李遇。迎新郡太守於城西。既行十餘里。聞尚遠。遂還家。忽見百許人從路傍出。皆如三五歲兒。大呼而前。合圍擊之。李初不懼。相與毆。每奮拳必十數輩仆地。纔仆即起。已散復合。如是數四。有躍而登肩。取巾擄髮者。李益窘。走不可脫。且擊且前。俄一老叟布袍草屨。不知自何來。厲聲咄曰。此官人常持法華經。若損他。豈不累我。叱令退。鬼遂散。老人亦不見。李迴及門。不能行。門卒扶以歸。至家昏不醒。諸子揭衣視之。但青痕徧體。即就其處招魂。請僧誦蓮經。涉半年餘。始能策杖而行。老人疑土地神云。

宋陸沅。道號省菴居士。住明之橫溪。文章左丞陸佃之孫。官至刑部都官郎中。任福建提舉。丁母憂而歸。中交代鄭興裔之言。閒退于家。客至必合瓜而言曰。某與鄭無隙。此厯刼中冤耳。果此心不安。必彼此酬酢無了時也。予謹當以善法而解之。遂一志持蓮經。每晨起即澡浴更衣。入淨室中。

焚香跣趺。目不他瞬。首唱偈曰。盥手清晨。貝葉開。不求諸福。不懷災。世緣斷處。從他斷。劫火光中。舞一迴。然後開卷而讀。不緩不急。聲如貫珠。日一徧者三十年。登八秩。增至三部。賦詩見意。有清晨三度到靈山之句。即以紙界方窠。劃滿百部。為一圖子。積成巨軸。總其數則九千四百八十五矣。計其卷則六萬六千三百九十五矣。餘暇又閱毘盧大藏。凡是台教律部。少林心宗。無不博究。復誦弥陀佛號。一意西馳。紹熙五年。壽八十五。四月六日。索湯淨身。冠衣整容。就寢而逝。泊殮。入。忽聞蓮華馥郁之氣。皆不知來處。近挹之。蓋噴之於口鼻中也。是時女人多不聞香。豈五障所蔽乎。

唐淮寧近城河北岸。有華臺寺。其始乃一大姓家。有室女。能誦法華經。其兄娶妻。心亦樂學。未幾。姑與嫂俱能背誦。每至更闌夜靜。月白風清。二人同聲以誦。雖世之憂玉銷金。無以並其韻矣。一時病姑嫂併歿。異日嫂墓。忽生紅蓮一朶。開敷妙盛。人悉異之。啓看。乃見蓮根自嫂之口。連貫姑墓。又發姑墓。其根蓋出于姑之舌本焉。蓋嫂之經從姑以授。表相因由也。

唐武德中。都水使蘇長授巴州刺史。帶家族赴官。因渡嘉陵江。中流風作。

船帆傾沒。男女六十餘人。一時喪失。唯一女使。常讀法華經。浪入船中。女乃頭戴經函。誓與俱沒。既而女即不沉。隨波泛泛。頃刻至岸。捧函而上。開視其經。了無沾濕。此女後嫁於揚州。其篤信讀誦。愈於舊也。

宋紹興末。奉化縣有姓趙人。其母平日重佛齋戒。誦法華經。房下有一女使。每竊聽。久久忽記得四句。所謂青蓮華香。白蓮華香。華樹香。果樹香。自此動靜施為。常吟咏不絕。人聞之。謂為笑語。殊不知此女亦有用心處。一日作事。垂主意。筆楚至死。遂以其屍潛瘞後園。異時忽於其上。秀出青蓮華一朵。香色可愛。餘人不知其因。獨趙母默而識之。蓋所誦四句經。感應之如是也。趙母復不匿其德。密說與虛堂法師。本空。空每舉此以化人。

唐天童山景德禪寺。始西晉時。有學佛者。立祠巖下。垂四百載。至開元二十年。高僧法璿。按圖記。披榛莽。得故跡。造精舍於山麓之東。秘書省正字萬齊融。首建多寶塔于西南隅。峭拔數仞。法璿居此。日誦法華經。感天童躡雲升降。捧天食來供。師遇夜。則繞塔行道。人遙見師身與塔之相輪等。初母夫人夢吉祥天女。引行摩利上宮。已而姓師焉。茲所謂太白禪師也。

寺有范的撰記備述其事。

梁尼諱道蹟。號總持。不知何許人。得法於菩提達磨。進居湖州卞嶺之頂峯。晝夜誦法華經。滿十萬部。幾二十年不下山。後歸剡塔。全身於結廬之所。至大同元年。塔內忽有青蓮華一朵。道俗異之。因啓看。見尼肉身不壞。其華從舌根生。又於中獲蓮經一部。州郡錄實奏。勅置法華寺。

唐吳興僧抱玉。母梅氏孕。協靈祥。即惡蓮穢。既誕。乳歲。即思佛乘。遂於尼總持法華寺出家。願誦蓮經。三月通貫。自此日持七部。年登二十。詣京受戒。時肅宗皇帝夜夢吳僧誦法華經。口出五色光。吳音清亮。洎翌旦。陞朝。勅京城僧能誦法華者二百餘人。並入禁中。帝視之。皆非所夢者。其抱玉方入關。關令問其遠來之意。答云。善誦蓮經。特來受戒也。令奏帝。即降旨召見。帝曰。朕所夢者。音容宛若。遂勅令上殿。賜坐誦經。至隨喜功德品。口角放五色光。帝大悅。曰。朕夢中所覩之光。即此也。經纔畢。賜七寶湯。令別築香壇。專為受戒。賜名大光。封天下上座。居京三年。專一持誦。又勅千福寺行道經四七日。而梵音徧滿。常通聖聽。別居藍田精舍。復詔住資聖寺。

光以慈親在吳。上表乞歸報恩。勅不允。再加首飾。戴法華經誦念。尋有詔許還。光奏曰。臣歸鄉有三願。就養老母。一也。乞度天下僧。二也。願增造法華寺三也。詔並許。勅湖州以官緡增廣寺宇。賜墨詔一道。多寶塔一所。彌勒像一軸。金字蓮經一部。七寶念珠一副。一人侍行。既歸。乃依法華寺松逕築菴以居。日持華偈。報上大恩。至永貞改元。季冬。往別刺史顏防。善曰。余去矣。人世無常。猶如夢幻。還寺恬然坐逝。感異香飄拂。三日不消。瘞于菴側。時衆咸謂師即梁朝尼總持後身。師居藍田日。寺僧先夢天童來降。告言大光經教通于有頂。非聊爾也。光一日宴坐道場。自見神人從天而下。以手按摩于心。自爾功力彌著。形神不勞。師偶山行。忽墜龍井。即思多寶佛塔。願持此品十萬徧恍然奮脫。有若神人捧出。後詔住資聖寺。寺文德皇后造。忽遭回祿。於瓦礫中得數部經。不損一字。以事奏聞。降旨重造。光覽其經。倍加精進。次乞歸吳地。既即止。烏程相國李紳刺于吳興。醉於持經道場。夜醒。忽見白光滿室。往覘光。公宴坐持經。光起面門。經轂向息。光亦隨歛。

宋太平興國中江南僧懷德自離俗謹厚飭身誦通法華因以得度自爾雖登講席終以誦持為專務晚游泗上禮僧伽塔屬太宗遣使賫幡華上供德誓欲焚身供養先捨衣千匹設齋次衣以紙服纏身灌蠟禮辭衆僧手執雙燭登甃積上發火誦經至火燄熖高猶聞誦經之聲不輟及收餘骨舍利尤多遠近莫不稱歎

宋僧紹巖雍州劉氏子七歲入道凡百經書覽同溫習遊方至杭州掛錫水心寺恒持法華經不捨晝夜俄感陸地生蓮華舉城瞻矚巖亟蹂之因發誓仰倣藥王焚身時錢王篤重歸心苦留乃止尋復潛往投身曹娥江用飼魚腹投而不沉云有石神人捧足適漁者救之錢王即造上方院召以居焉開寶中感疾不救藥石即頽命曰吾誦蓮經及二萬部決以安養為期今幸遂懷言已坐亡襄事官供茶毗于龍井山獲舍利無筭骨猶玉瑩乃以石函寘于影堂太師孫承祐製墓碑

宋成都府有僧誦法華經有功雖王均李順兩亂於蜀亦不遇害一日忽見山僕曰先生來晨請師誦經在藥市奉迎至則已在引入溪嶺數重烟

翠見一跨溪山閣乃其居也。僕出曰：先生請師誦經。老病起遲，若至寶塔品乞見報。師報之。先生果出，野服藜杖，兩眉垂肩，默揖焚香，側聽而入。齋則藤盤竹箸，秣飯杞菊，不調鹽酪，美若甘露。飯訖，下視一錢。僕曰：先生寄語遠來，不及攀送，僕即送行。僧於中途問曰：先生何姓？曰：姓孫。何名？僕即於僧掌書思邈二字。僧嗟駭，僕忽不見。凡尋三日，竟迷路踪，歸視視金，乃金錢一百，由茲一饌，身輕無疾。至大宋元禧中，年一百五十歲，長遊都市，後隱不見。

晉僧景超，素持戒範，性質直不苟循。餅包廬山唯誦妙經為常務。禮華嚴經一字一拜，已及二徧，乃燒一指為供。次禮法華，煉指亦然。自後身膚內隱隱出舍利，磊落圓瑩，或有求者，坐席行地皆獲之。石晉天福中，卒於菴所。

漢僧洪真，滑州淳于氏之子，少悟塵樊，決求出離。介然之性，雲鶴相高。師授妙法，一舉通利。生來所誦，約一萬過。鎧甲精進，餘無過事。後詣朝上表，乞焚身供養佛塔，勅不允。真歎曰：善根微弱，魔障尤強，遂退廣愛寺，罄捨

衣盂作非時施。忽怡然坐逝。經于數日。顏貌如生。洎遷化。舌根儼在。益更鮮紅。伊洛之人重之如佛。

宋明州開元僧可久。常誦蓮經。時稱久法華。元祐八年。無病端然坐亡。過三日忽甦。云吾已神遊淨土。其土之相與十六觀經所說莊嚴一同。七寶池中。所有蓮臺。皆書當生者姓名。一紫金臺書云。大宋成都府廣教院熏法華。已生其中。又一金臺書明州孫十二郎。又一金臺書明州久法華。又一銀臺書明州徐道姑。言訖復坐去。至後五年。徐道姑果坐亡。亡時聞異香滿室。過十二年。孫十二郎卒。時聞天樂之聲。靈瑞重疊。人皆仰之。

宋僧若觀。世烏鎮人。俗姓錢氏。從釋於嘉會院。立行卓爾。四衆欽之。紹興十八年。嘗結緇白輩。脩行淨業。其勸化榜子云。某伏念生死無際。輪迴不息。唯安養之歸。則無退轉。某遁跡山間。生滅夢幻。幾二十年。不入城市。常看法華光明二經。每日各一徧。終始不倦。誓與法界衆生莊嚴淨土。入會者各念佛號十萬聲。先得道者通相度脫。前後命終。各執青蓮華。往生淨土。一日。空相講主見訪。齋次。食方三味。忽索筆書偈。趺坐而終。空相證明。

大為勝異。茶毗正值日輪當午。舍利迸出。光瑩奪目。道俗競取。而骨亦不存。

宋僧從雅。錢塘人。肄業淨住院。依天竺海月都師。得台衡三觀之傳。然無經世意。乃曰。慕虛名。爭如脩實行。言清行濁。聖賢所呵。遂歸南山天王院。專以讀誦為業。平生閱法華經五藏。金剛四藏。彌陀十藏。禮釋迦三十萬拜。禮真身塔十遍。每一字三拜。禮法華經三遍。禮彌陀佛一百萬拜。誦此佛號五千萬聲。時憲使楊傑嘉其精脩。以所撰安樂國贊十章贈之。師欲以此化導無窮。遂圖三輩九品真容。列以贊文。刊石淨住院。一生坐不背西。其精誠類如此。後無疾坐逝。感異香滿室。天樂盈空。人皆謂西聖來迎之兆矣。

宋僧思聰。錢塘人。年十五入天竺靈隱山。就法安寺出家。立志勤苦。每日出城化僧供。夜而不寢。專誦蓮經。至二十歲。抱經投試。即預選僧。自此日持二部。餘則又稱佛號。或謂之曰。誦經足矣。何必更稱佛乎。師曰。命終欲生其國。安得不繫念在心。一日感氣疾。乃曰。某夜來已見佛菩薩衆。並云。

同來接引。更兩日。吾其行矣。弟子祖安曰。恐是魔境。不可擅隨。師曰。吾命終時。若於胸中生蓮華。則往淨土之驗矣。過兩日。天始拂明。命安殷殷曰。佛及菩薩已滿虛空。衆共稱佛。奄然而終。探其身皆冷。唯胸前如掌許溫潤。有若蓮華敷榮之狀。果符所說矣。

宋僧靈照。東陽人也。生而傑異。志願為僧。自入空門。未嘗偃卧。晝夜禮誦。未逾一月。通法華光明二經。年過弱冠。中試經第。進具以來。負笈教庠。盡得天台三觀之道。累尸名刹。晚止華亭超果。元豐間。結諸善知識為社。仰東林之風。慕西方之訓。嘗夢彌陀三聖。師跪而問曰。某一生誦經。期生淨土。為果願否。觀音指曰。淨土不遠。有願則生。勿復疑之。又於靜夜誦經。夢睹普賢。因即發心。造菩薩像。誓誦蓮經一萬部。以嚴淨報。餘之所誦。不計其數。忽卧疾。謂衆曰。吾病中見有異相。淨土之期決矣。遂累足而殂。閤維舌根不爛。柔潤如生。舍利遍流。赤白相間。

宋僧可諒。俗楊氏。鄆人也。七歲出家。誦通法華二十二策經落髮。師風骨清儉。志趣不羣。攝威儀。謹言語。課誦佛書。日有常度。恪脩淨業。一覽大藏。

經九載熏脩法華懺行住坐臥常在其中不見世間過患。一日寢疾。召弟子曰。吾大事將至。汝當精進行道。毋忽吾言。吾平生進脩未嘗犯戒。若實得道死必有異。過數日。俄而床足土上產芝草一本。其色白。其紋如蓮華。師見而言曰。吾居現此。去時至矣。即書偈曰。無經可誦。無佛可念。今日臨行。大家證驗。投筆跏趺而逝。

宋僧惠詢。道號月堂。俗陳氏永嘉人。自童齡舉止傑異。因捨從釋。肄業祖印院。師授法華。登案數徧。即背讀。人皆駭異。披緇已。挺志于學。行愈勤。蓮經七軸。日課為常。縱新寒隆暑。寢病亦復不懈。十載于茲。言行俱滿。一日屬疾。氣色將行。弟子請說法。師曰。法豈有說耶。即索筆書偈告衆。驟稱佛號。垂手兩結彌陀印。跏趺而終。遺言依五天佛制。火浴法。骨分為二。一紬胸山親壘。一塔南城祖原。議者以諸祖皆窆全身。遂薙頂髮以表師志。將一歲猶未往。偶學者至。啓髮瞻禮。忽睹舍利盈掬。光彩陸離。提舉陸沅為之贊。

宋僧雲佐。出家鄞之海慧院。素持法華經。策試得度。自是參學。台宗雖往。

返江山多歷年所而不廢所業。晚歸延慶四十餘年。靜處一室。清誦琅然。日以四部為率。年八十餘。偶老病不至困瘠。即索湯沐浴。更衣整肅。召同袍。諷四安樂行。少選之間。端坐而逝。泊從火化。煙燄上作金色。或五色芬芳。至收餘骨。得黑堅固。其相內空外圓。狀似搥子數珠。人頗異之。

陳華。字尼高。郵縣人。志節霜淨。言行冰清。誦法華不捨晝夜。初誦一卷。忽於右手爪上生一華。狀如綾絲。次第誦至第五。五指爪上皆生一華。誦徹六七。掌上併生二華。大過爪上。由是聲傳帝闕。陳武帝召入看之。從此郡人競呼為華手尼。

陳僧玄光。海東熊州人。少厭俗塵。專脩梵行。泊長遂越滄溟。求中國禪法。於是往衡山。參思大禪師。思察其根器。授以四安樂行。俄證法華三昧。返錫江南。附舟至于大洋。偶見彩雲雅樂絳節而至。空中聲曰。天帝召海東玄光禪師於龍宮。說親證法門。光拱手避讓。唯見青衣前導。尋入宮城。不類人間官府。無非鱗介鬼神。既登寶殿。次陟高臺。如問而談者。凡七日。事畢。王躬送別。光復登舟。舟人謂泛洋不進者半日而已。

唐尼法潤住丹陽三昧王寺。自少入道。精脩禪慧。通誦蓮經。日夕不替。至七十四而化。遺言令靈屍施生命。弟子遵承。蟲獸噉盡。唯心舌俱存。舌猶赤色。心稍黑焉。衆即起塔緘奉。

齊并州東罕山側有人掘地。見一處黃白相間。忽得一物。狀如兩唇。中有一舌鮮紅赤色。州縣異之。以事申奏。上問臣僚皆無荅者。即詔沙門大統法上。上奏曰。此是持法華經者六根不壞報也。其誦千部。徵驗如是。帝遂勅中書高珎曰。卿是信向之人。自往看之。必有靈異。珎承命而往。乃集諸持法華經僧。執鑪旋繞。宣誦此經。而告之曰。菩薩涅槃以經像法流行。欲無謬者。請現靈瑞。言已。聲誦此之脣舌。一時鼓動。有如讀誦之相。四衆覩見。莫不毛豎。珎回奏。詔以石函緘之。立塔旌表。

梁庾詵字彥寶。新野人。幼聰警。篤學經史。賦性夷簡。特愛林泉。蔬食弊衣。不事產業。少與武帝相善。及起兵。署為平西府記室。又詔為黃門侍郎。並稱疾不起。晚年專志釋教。宅內立道場。六時禮懺。誦法華經。每日一遍。忽於後夜見一道人。自稱願公。容止甚異。呼詵為上行先生。授香而去。後寢

病既愈。曰。願公復來。不可久住。顏色不變。遽然而化。舉室咸聞空中唱上行先生。已生彌陀淨域。詔謚貞節處士。

宋撫州有華藏寺。在縣南七十步。於昔李唐朝號光度寺。蓋唐有優婆塞。

華言近於此地專誦蓮經。一日忽見老叟。言是潭陂七郎君。潭陂七郎君廟在郡祀典

告曰。願輟誦少頃。假道以過。旦日當為營建精舍。是夕雷電風雨大作。曉

霽。遽見棟梁椽桷萃疊其上。爾後優婆塞歸。窺以全身塔于寺南。至宋祥

符中塔內忽生蓮華七朶。舉郡異之。

宋范儼。仁和縣人。常時蔬食。不涉世緣。其子不能治家。儼不之顧。但云我

自是寄客耳。於是日讀法華經。專心不懈。復書寫是經一部。大觀中。年七

十餘。偶呼甥徐侃曰。汝當為吾治後事。吾祇三兩日在。侃續聞儼在佛堂

中。高聲呼普賢菩薩。應諾數番。多云固是兩字。侃問之。荅曰。我見普賢乘

六牙白象。光明射我。純作金色。謂我嘗誦法華經。念彌陀佛。得生淨土。故

來相報。汝明日卯時當行。吾與彼佛同來接引。我從此應諾也。至時儼即

念佛菩薩。便觀衆聖授手。自稱儼是何人。得佛菩薩接引。連言實是難當。

遂就座。合掌瞑目而去。

唐聖曆中。有沙彌名彌伽。雖未受是身。意清淨。專誦華嚴。一日帝釋遣使迎請。伽曰。未審天帝何緣見命。使曰。帝與脩羅時戰。欲求法力加彼。伽曰。沙彌無法。使曰。唯見法師專持華嚴。可為人天福田。所以見迎耳。於是受請。閉目俄頃。便至天宮。延請入殿。誦華嚴經。坐于寶臺。乘空而行。向其敵所。脩羅軍衆睹此威靈。怖竄藕孔之中。帝喜。迎師還宮。供養。施以七珍異寶。又白師言。若須長生之藥。當以奉上。師曰。割愛出家。求無上道。世間珍異及長生事。非所志焉。帝釋禮謝曰。成菩提時。願相救度。遣使送還。

宋荆王夫人王氏。元祐中。事西方。課經佛甚精恪。獨一妾懈慢。夫人將逐之。其妾悲悔。極加精進。一夕異香徧室。無疾而終。夫人忽夢妾起居叙謝。因夫人訓責。今獲往生。夫人曰。西方可往否。妾曰。但隨妾行。夫人隨之。見二池皆白蓮華。或榮或悴。妾曰。此皆世間發心脩西方人也。世間纔發一念。池中即生一華。隨其勤惰。榮悴各異。中有一華朝服而坐。其衣飄揚。隨風消散。即寶冠瓔珞莊嚴其身。妾曰。此揚傑也。又有一華朝服坐上。其華

稍悴。曰。此馬玠也。復前導數里。遙望金壇光明。文徹妾曰。此夫人化生處。上品上生也。徐訪楊傑。則已亡。馬玠則無恙。後夫人於生日。秉爐焚香。望觀音閣佇立而化。

隋大業中。秦州有慕容文策。誦法華金剛。晝夜不息。一日忽有二人持文帖一通示云。閻羅大王遣追汝。可便行。策驚怕。隨便至一大城。牆郭六重。門戶黑闇。過已。便見宮殿。閻王正坐。部衛威嚴。下有男女。諸國殊形。一唱名。至文策。王問行業。策荅以能誦金剛法華齋戒等事。王合掌令所由考籍。云未合死。王判放還。策西去。不知途路。忽逢一沙弥云。可隨吾後來。過六重門。遇黑闇處。沙弥手執明炬。遂得出而復生。策由此精苦念誦。宋僧惟渥。錢塘金氏子。稚歲離俗。克勤通經。考試中策。即預法流。立志深靜。杜門謝事。殷誦此經。足五千遍。自康定二年起。首闕藏。每卷終誦心經五卷。一藏告滿。五藏心經亦圓。如是者三過。看華嚴經二百部。光明經五千部。心經一百藏。金剛小弥陀大悲咒各二十藏。楞嚴圓覺維摩各三千部。千佛名經二千部。彌陀尊號一十萬聲。所有善因。一意莊嚴淨土。崇寧

元年秋。偶疾。捏印坐亡。壽八十九。火浴。齒數珠不灰。

宋僧曇異。生姚江杜氏。脫素于龍泉寺。皇祐中。普恩得度。習台教於兩浙。所業既遂。即還舊居。或以住持強之。皆確然不就。晚年掩關絕事。專脩淨業。誦法華經滿五千部。普賢觀。弥陀經一萬卷。佛號不計數。崇寧改元。忽染疾。召徒屬焚香告曰。吾生淨土。時已到矣。當乘金剛臺。隨佛西邁。願勉力進脩。可得相見。言訖。手結佛印。泊然坐殞。茶毗。舌根數珠不朽。人所敬歎。

劉宋尼慧玉。長安人。勤戒行善。道德通備。教化游行。不避寒暑。住江陵牧牛寺。誦法華。楞嚴等經。旬日通利。世以為奇。元嘉中。焚香禮佛。誓曰。吾若誠心有感。捨身之後。必見佛土。七日之中。願見佛光。至于五夜。寺東樹林。忽現光相。形色赫然。眾見歡喜。即於發光之地。起立禪堂。以安清衆。

唐法師廣脩。俗劉氏。東陽人也。天姿貞亮。卓爾具體。日誦法華經及維摩。光明等。六時行道。老而益堅。每年行七七。日懺摩。蓋止觀中第四。隨自意。三昧也。後以三觀付門人物外。會昌中。沒于禪林寺。遷神於佛隴金地。弟

子良汶發墳火化。淘收舍利一千餘粒。建塔藏之。

魏沙門曇鸞。洛下遇菩提流支。

梵僧

問曰。佛道有長生乎。支笑曰。長生不

死。吾佛道也。既授以觀音經。曰。能解此。則三界無復生。六道無復轉。師承

其語。晝夜專誦觀音經。脩三福業。觀想九品。北魏主嘉之。號神鸞。勅住汾

州玄中寺。一夕正持誦。見梵僧入室。謂曰。吾龍樹也。以汝有淨土之念。故

來見汝。鸞曰。何以教我。僧曰。已去不可及。未來未可追。見在今何在。白駒

難與回。言訖不見。鸞即令弟子同音唱佛。西向瞑目而化。

隋僧慧恭。俗周氏。成都府人。從釋招提寺。與僧慧遠結契勤學。取成法器。

遠往長安聽成實論。還鄉講授。卓爾絕倫。恭去荆揚訪道而歸。契濶三十

年。夜話次。遠語如流。恭杜無所對。遠譏之。恭曰。賦性至愚。無所解也。遠曰。

可不誦得一經乎。恭曰。誦得普門品。遠猶輕之。恭曰。經卷雖小。佛口所宣。

當為兄誦一遍。恭即敷座而誦。纔發聲。覺有香氣。次見天花零亂。天樂嘹

亮。經已便息。遠作禮稱讚。願留教誨。恭曰。非某之力。諸佛力耳。恭即拂袖

而去。不知所終。

宋潞州人周開山誦華嚴經甚是虔誠時澤州東門有一僧能誦金剛經二人一時俱暴死同至冥府王延請開山誦所業經甚禮敬之又延僧誦金剛經心不甚敬誦訖王問典簿云二人俱有壽遂皆放還其時誦金剛經僧恃所誦多王不甚敬禮心大愧乃問開山所住何處後願相尋二人既蘇誦金剛經僧往往潞州訪得開山問其所以開山曰每誦此經必精潔衣服洒掃淨室然後燒香祝願肅心啓口常如對佛不敢怠忽僧乃謝曰吾有罪矣吾每誦經居常輕率身口不淨誠意不至古人有言多惡不如少善於今取驗僧自此誦經之際必極至誠不敢惰慢

宋建初中有僧普明少出家性純素常蔬食布衣以法華維摩為日課每誦至勸發品即見普賢乘象前立誦維摩時即聞空中有倡樂之聲鄉人王道真妻病革請師持呪方入門病者悶絕忽見一物如狸長數尺從狗竇出其病即愈又嘗行水旁有巫者云神明見明法師悉皆奔走

晉周璠者曾稽剡人也家世奉法璠年十六便菜食持齋諷誦正月長齋竟延僧設受八關齋至鄉市寺請其師竺僧密及支法階竺佛密令持小

品齋日轉讀。至日三僧赴齋。忘持小品。至中食畢。欲讀經方憶。意甚惆悵。璫家在坂怡村。去寺三十里。無人遣取。至人定燒香訖。舉家恨不得經。密益跋蹠有頃。聞有叩門者。言送小品。璫愕然心喜。開門見一年少著單衣。袂先所不識。又非人行時。疑其神異。便長跪受經。要使前坐。年少不進。期夜當來聽經。比道人出。忽不復見。白氣遍一宅中。既而視之。乃是密經也。道俗驚喜。密經先在厨中。緘鑰甚謹。還視其鑰。儼然如故。於是村中有十餘家。咸皆奉佛。益敬愛璫。璫遂出家。字曇疑。諷誦衆經。至二十萬言。

昔有一比丘誦阿彌陀佛經。及大般若波羅密經。是人欲死。語弟子言。阿彌陀佛與其大衆俱來。須臾命終。命終之後。弟子燒之。明日收灰。見舌不燒。

梁富陽齊堅寺。有釋道琳。本會稽山陰人。少出家。有戒行。善涅槃法華。誦維摩經。吳國張緒禮事之。後居富陽縣泉林寺。寺常有鬼恠。自琳居之。則消琳弟子惠韶為屋所壓。頭陷入甕。琳為韶祈請。韶夜見兩胡道人。拔出其頭。旦起。遂平復。琳於是設聖僧齋。鋪新帛於牀上。齋竟見帛上有人跡。

皆長三尺餘。衆咸服其徵感。富陽人始家家立聖僧座以飯之。至梁初琳
出居齊熙寺。天監十八年卒。春秋七十有二。

晉周子長。僑居武昌五丈塘東垌頭。咸康三年。子長至寒溪浦中。暮還五
丈。未達行一里許。先是空垌。忽見四匝瓦屋當道。門卒便捉子長頭。子長
曰。我是佛弟子。何故捉我。吏問曰。若是佛弟子。能經唎不。子長先能誦四
天王及鹿子經。便為誦之。三四過。捉故不置。知是鬼。便罵之曰。武昌癡鬼。
語汝我是佛弟子。為汝誦經數偈。何故不放人也。捉者便放。不復見屋。鬼
故逐之。過家門前。鬼遮不得入門。亦不得作聲。而心記將鬼至寒溪寺中。
過子長。便擒鬼。復罵曰。武昌癡鬼。今當將汝至寺中和尚前了之。鬼亦
擒子長。臂相拖度五丈塘西行。後諸鬼謂捉者曰。放之。向西將牽我入寺
中。捉者已放子長。故復語後者曰。寺中止有道人輩。何乃畏之。後一鬼小
語曰。他能誦經。以此放了。便共大笑。子長達家已三更盡。

唐僧大行。入泰山持普賢懺三年。感大士現身。晚歲入藏室。陳意。隨手取
卷得弥陀經。乃日夜誦詠。至三七日。觀琉璃地上。佛及二大士現身其前。

僖宗聞其事。詔入內。賜號常精進菩薩。後一年。琉璃地復現。即日而終。異香旬日不散。肉體不壞。

元如一菴者。永嘉人。姓袁氏。先誕五日。父夢一異僧持梵經至。問何來。曰五雲山。問姓。曰姓殷。問名。亦曰姓殷。且謂後五日當再來。留經表信。至期果誕。師頭骨嶄聳。目光射人。年十五。師事方山和尚。出家受具。久依竺元和。尚得其要領。住保福。退居西澗。庵十年。道望益隆。師早年發志。暗誦首楞嚴經。至第五卷。得嘔血疾。乃輟。疾瘳。一夕夢見所未誦經。皆金書布空中。厲聲讀之。既覺。猶存。移時始隱。故師再誦。足此一經。每日誦一過。至終第終第。

宋岑闍梨姓楊。臨原人。於繖蓋寺西山泉側。造誦經堂。每誦金光明經。感得四天王來聽。後讀藏經。皆悉不忘。計誦三千餘卷。服布乞食。鉢中之餘。飼房內鼠百餘頭。皆馴繞爭來就人。鼠有病者。岑師以手摩捋。日愈。

宋釋慶謙。繼神照住白蓮。一夕會弟子設香華。諷普賢觀經。阿彌陀經。端坐稱讚淨土功德。復告衆曰。吾得無生日用有年矣。今以無生而生淨土。

如入禪定奄然而化。

昔有官人擬赴懷州縣令。為無錢作上官行李。遂於泗洲普光寺內借取常住家錢一百貫文。用充上官。其時寺主便以接借。即差一小沙彌相逐。至懷州取錢。其沙彌便與官人一同乘船。至一深潭夜宿。此官人忽生惡心。不肯謀還寺錢。令左右將一布袋盛此和尚拋放水中。緣此和尚自幼隨師出家。常持佛頂心陀羅尼經供養不闕。常不離手。所在之處。將行轉念。既被人殺。殊不損一毫毛。只覺己身被人扶在虛空中。如行暗室。直至懷州縣中。此官人既到任。三朝後。忽見小和尚在廳中坐。不覺大驚。乃問和尚有何法術。此沙彌具說衣服內有佛頂心陀羅尼經三卷。此經功德不可具述。此官人聞語。頂禮懺悔。便於和尚邊請本。破自己料錢。喚人向廳前抄造一千卷。置道場內。日以香華供養散施。後勅加懷州刺史。故知此經功德無量。

齊僧慧光居洛陽。著華嚴涅槃十地等疏。妙盡權實之旨。一日有疾。見天眾來迎。光曰。我所願歸安養耳。已而淨土化佛充滿虛空。光曰。唯願我佛

攝受遂我本願。即彈指警歎言氣俱盡。

齊法琳法師。晉原人。嘗誦觀音經。輒一僧大身。在前。逮武二年。感疾。見寶樹下一佛二大士像。坐蓮華上。琳大慰喜。夜半聞鐘聲。眾就視之。即席而化。

齊僧柔。學方等諸經。文宣詔至鄴下。柔唯以淨業為懷。亡之日。見化佛千數。室內外聞異香。西望敬禮。即時遷神。

隋僧慧成。居枝江。誦阿彌陀經。脩西方觀。三十年。常坐不卧。每入定。見淨土蓮臺寶樹。臨終之夕。人有夢。無蓮華上隱隱西沒。

隋僧慧命。天台仙城人。專志念佛。臨終。誡門人精進淨行。眾忽見阿彌陀佛。領眾來迎。師隨佛後。尚西而去。

隋僧智舜。廬山踵遠公淨業。講觀經才終。即示病。見鸚鵡孔雀。念佛念法。皆微妙聲。告弟子曰。我今日往生矣。既而果遷化。時大業初歲也。

梁高浩。象東平人。杜門靜坐。專誦無量壽經。觀中汎紅葉於玉沼。初未見佛。乃即華上傾心致敬。遙睇佛之金容。光輝遠暎。一夕見眾菩薩來迎。奄

忽而化。

宋常熟陶氏寡居。常持普門品。夢白衣人授以蓮花。令食之。又夢梵僧授以彌陀經。覺即能誦。不假師授。一夕帳幌光明。有彌陀像立經函上。每誦經時。必於卷上迸出舍利。積以成合。

魏甘露五年。沙門朱士行者。誦小品經。恨章句未盡。以此年往西域尋求。獲之。彼有留難。不許東返。士行執經王庭曰。必大法不傳。當從火化。便以貝葉經投火。一無所損。經乃放光。舉國敬異。便放達東夏。即放光般若經。是也。年八十亡。依法火焚而屍不壞。道俗異之。乃俱祝曰。若真得道法。屍應毀壞。便應聲摧碎。遂收而起塔焉。

宋樂平檀源民唐富。本農家子。而亦時時為人屠殺。慶元元年三月。白晝在家。有持文引一紙來者。意謂縣司公吏拒之曰。我小民無罪過。又不曾與人爭訟。何緣追喚語未了。身已隨驅出門。回顧則仰卧地上。妻兒環之而哭。始知是死。即懇諸吏曰。不審以何事見攝。還可再生否。略不答。泣告再三。方云。照殺螭子公事。富答言。自念尋常不曾妄踐踏虫蟻。只記屠了。

牛十三頭猪二十口。若得放還。誓願改過。吏云。此非我可主張。且到柰河橋頭。汝自告判官乞檢簿。遂偕進。至一河邊。高橋踣之。緋衣官人執簿。吏附耳曰。此乃判官也。兩犬極獍惡。迎吠河津。不容人過。於是再拜致禱。緋衣為閱簿曰。幾乎錯了。殺螭子者。乃是彭富。與汝不相干。兼汝壽數未盡。當使汝還。富拜謝之次。牛猪如所屠之數。各啣一紙浮河而來。緋衣叱使去。仍命數卒遮護。戒之云。今再履人世。宜便改業。做善事。誦佛經。如不識字。但稱念佛名亦得。遂合掌高聲念阿彌陀佛。不覺被人推倒而寤。死已經夕矣。從此不復鼓刀。專理田業。終身念佛不輟。

國朝湖廣黃州府蘄州黃梅縣四祖禪寺僧尚智。其徒曰法幢。初本廣濟縣民李雲隆次子。雲隆嘗於乙巳歲三月十九日夜夢四祖寺長老到家。借住。遂生法幢。洪武九年已十二歲。送寺出家。在寺專寫諸品經文。持誦并施與人。日念阿彌陀佛不絕聲。十七年八月內。尚智同法幢往本家省視父母。在途遇舊識余高男。余志五。尚智與志五談論既去。法幢云。此人無一點善念。尚智云。彼如此。孰能化之。法幢言。我能化之。尚志言。爾有何

道以化之。法幢言。我往生他家。尚智云。爾何輕言。法幢言。人人可為父母。後因事往黃州府回雲隆家。遂坐化。茶毗後。其指甲齒牙并原持數珠俱不壞。有舍利無數。時人咸見。作偈頌之。二十年十二月初三日夜。雲隆及尚智皆夢法幢言。往余高家託生。二人相見。皆言所夢而異之。明年正月初十日。遂偕往余高家究其因。余高言。亦嘗於是夜夢法幢藏主到家。入第五男余志五房內。三人所夢皆同。余高乃云。他日若生男子。還送出家。是年九月二十日。果生一男子。尚智後聞其家生男。往視之。其子笑入懷抱。遂名曰善來。後歲餘。抱至寺禮佛。直入生前卧房。一徧認舊時衣服。呼之曰法幢。即應。尚智又新製小直裰藏。放他處。即令尋取。二十六年。父母捨入本寺出家。仍以幢藏主稱之。今年二十歲。終日持誦法華圓覺等經。其父母家亦持齋供佛。今悉化為善矣。後召至京。詔仍舊名曰法幢。





